



BOSNA I HERCEGOVINA
Ministarstvo odbrane-obrane



БОСНА И ХЕРЦЕГОВИНА
Министарство одбране



NAŠA VOJSKA НАША ВОЈСКА

Bilten Ministarstva odbrane - obrane i Oružanih snaga Bosne i Hercegovine
Билтен Министарства одбране и Оружаних снага Босне и Херцеговине

novembar / studeni 2023. broj 25

носембар 2023. број 25





**Bilten Ministarstva odbrane
i Oružanih snaga BiH
„Naša vojska“**

Broj 25

Novembar 2023. godine

Izdavač:
Ured za odnose s javnošću
Ministarstva odbrane BiH

Za izdavača:
Uma Sinanović

Sarađuju:
Sektori i uredi Ministarstva odbrane BiH
ZŠ OS BiH, Medijsko-informativni centar
(MIC), komande i jedinice OS BiH

Pripremili:
Uma Sinanović, Antonio Prlenda

Lektor:
Vanja Rakanović

**Ured za odnose s javnošću
Ministarstva odbrane BiH**

Adresa: Hamdije Kreševljakovića 98,
71000 Sarajevo

www.mod.gov.ba
info@mod.gov.ba

Kontakt telefon:
033/286-680,
Fax: 033/286-685

Tehnička priprema i štampa:
„ERMEX“ d.o.o.
II sarajevske brigade 80,
71123 Istočno Sarajevo
Telefon/fax: 057/350-007

info@ermex.ba
www.ermex.ba

MINISTAR ODBRANE BiH ZUKAN HELEZ

MORAMO PODRŽATI USPJEŠNE FIRME DOMAĆE NAMJENSKE INDUSTRIJE



**Ministar Zukan Helez pokazuje neskrivenu podršku razvoju
domaće vojne industrije, koja je uvijek bila podsticaj
cjelokupne proizvodnje i ekonomije cijele zemlje.**

Zamjenik predsjedavajuće Vijeća ministara BiH i ministar odbrane Zukan Helez 27. oktobra je posjetio tvornicu namjenske industrije „Pretis d.d.“ u Vogošći kod Sarajeva, kako bi podržao njen daljnji poslovni napredak na svjetskom tržištu naoružanja i municije.

Helez je održao sastanak sa menadžmentom „Pretisa“, na čelu sa direktoricom Almirom Zulić, ali i obišao gotovo sve proizvodne pogone. On je razgovarao i sa radnicima ove tvornice, čiji su glavni proizvod različite granate i projektili za artiljeriju i tenkove.

Predstavljajući firmu „Pretis“, direktorica Zulić je istakla kako je nakog teških poslijeratnih godina ova tvornica vojne industrije sa podmlađenim kadrom konačno stabilizirala svoje poslovanje te počela ostvarivati i važne izvozne rezultate. Ona se posebno zahvalila ministru Helezu što je prepoznao stratešku važnost ove tvornice te zaključila da je Helez vjerovatno jedini državni ministar koji je nakon dugo vremena posjetio „Pretis“.

„Drago mi je što razmišljate na strateški način i da ste ponovno zapaženi na svjetskom tržištu. Namjenska industrija je oduvijek bila podsticaj cjelokupne proizvodnje u našoj zemlji i mi u vlasti moramo iznalaziti modalitete kako vas dalje podržati. Moju podršku ćete zasigurno imati“, kazao je ministar Helez.

Helez je iskoristio priliku i razgovarao sa radnicima u različitim fazama proizvodne linije „Pretisa“. Posebno su ga zanimali uslovi rada te daljnji planovi i perspektiva za sve zaposlene u tvornici, ali i još bolji plasman domaćih proizvoda na zahtjevnom svjetskom tržištu.

Također, ministar Helez je ranije, još 17. augusta, posjetio i proizvodne pogone fabrike namjenske industrije „Binas“ u Bugojnu, koja je također u proizvodnoj i razvojnoj ekspanziji. Domaćin ministru odbrane i delegaciji Vlade Federacije BiH bio je v.d. direktora kompanije „Binas“ Abaz Mandžuka, koji je goste upoznao sa proizvodnim kapacitetima, produktima i izvoznim aranžmanima ove kompanije, koja je u usponu i koja je preporučena dolaskom novog menadžmenta.



NOVA VRHUNSKA UNIFORMA ZA ORUŽANE SNAGE BiH

Pripadnici Oružanih snaga BiH ovog su ljeta počeli da zadužuju novu terensku uniformu kvalitetnog platna i originalne maskirne šeme sa karakteristikama bosanskohercegovačkog podneblja, koju proizvodi firma Koteks d.o.o. iz Tešnja.

Izrada i opremanje novom uniformom realizira se u okviru desetogodišnjeg projekta obnavljanja kompleta terenskih uniformi u periodu od 2023. do 2030. godine, a radi se o zaduženju prve serije od 1.700 kompleta novih vojničkih uniformi za pripadnike OS BiH, prema prioritetima čiju je implementaciju finansijski podržalo Ministarstvo odbrane Njemačke.

„Učinili smo sve da se pazi i na najmanji detalj te da pripadnik Oružanih snaga BiH dobije uniformu kakvu i zaslužuje, najbolju i najkvalitetniju u regiji“, rekao je ministar odbrane BiH Zukan Helez 4. jula, pri posjeti pogona Koteks d.o.o. u Tešnju.

Taktičko-tehnološki zahtjevi

Od svoga formiranja, Oružane snage Bosne i Hercegovine koriste jedinstvenu terensku uniformu (JTU), nabavljenu kroz američki program Stranih vojnih prodaja (FMS), identičnu tadašnjoj digitalnoj maskirnoj uniformi američkih marinaca.

OS BiH su ovom uniformom opremane i nadopunjavane od strane Sjedinjenih Američkih Država, koje su osiguravale potrebne količine i autorsko pravo na korištenje navedenog dizajna.

Obzirom da je u međuvremenu taj dizajn uniforme prestao da bude dio opreme OS SAD-a, te ne postoji mogućnost daljnjeg



opremanja OS BiH postojećom uniformom kroz program FMS, nametnula se potreba za usvajanjem novog dizajna terenske uniforme (TU) OS BiH.

OS BiH su još 2014. godine formirale tim sa čijim radom je započeo proces usvajanja novog dizajna terenske uniforme OS BiH. Ovaj projekat je dalje nastavljen 2017. godine, kao program istraživanja i ispitivanja te razvoja potpuno novih materijala i originalne maskirne šeme sa karakteristikama bosanskohercegovačkog podneblja za novu uniformu.

Razvoj novih materijala bio je usmjeren i



ka prilagođavanju taktičko-tehnološkim zahtjevima te je bilo potrebno postići ujednačenost uniforme i opreme kroz sve elemente. U toku 2018. godine, nakon provođenja potrebnih procedura oko odabira najboljeg dostavljenog idejnog rješenja od strane komisije imenovane Odlukom MO BiH, usvojen je novi dizajn, te su u budžetu za 2020. godinu planirana sredstva za početak nabavke terenskih uniformi OS BiH.

U 2022. i 2023. godini MO BiH je izvršilo potpisivanje sporazuma-ugovora sa firmama „Koteks d.o.o. Tešanj“, „Dermal d.o.o. Kotor Varoš“ i „MEN d.o.o. Travnik“ za proizvodnju kompleta TU (uniforma, čizme i donje rublje).

Do sada, realiziran je ugovor o nabavci čizama, a ugovor o nabavci uniforme je realiziran 90 posto. Ugovor o nabavi donjeg rublja nije počeo sa realizacijom.

Prepoznatljiv dizajn OS BiH

Višegodišnjim projektom opremanja OS BiH terenskom uniformom, predviđeno je osiguranje sredstava kroz budžet u ukupnoj vrijednosti od 38,967.370 konvertibilnih maraka. Nabavka je usmjerena na opremanje OS BiH sa uniformama u periodu 2023 - 2030. godine, a radi implementiranja Pravilnika o uniformama u OS BiH i uvođenja u upotrebu terenske uniforme sa novim, prepoznatljivim dizajnom OS BiH.





Bazni materijal za hlače i košulju je tkanina "PUMA 220", hrvatske firme Čateks iz Čakovca, a posebnost ovog projekta je bila upravo u razvoju svjetske inovacije – trilaminata s licem od "PUMA 220" tkanine, koja je korištena za izradu jakne. Dosadašnji materijali za „softshell“ jakne sa 100 posto sintetike, iako predstavljaju općeprihvaćeno rješenje, prema mišljenju čateksovog razvojnog tima i predstavnika MO BiH, nisu u potpunosti zadovoljavali nametnute visoke zahtjeve prikrivenosti.

Prikrivenost u vidljivom i IC-spektru

Novorazvijena alternativa ponudila je jedinstveno rješenje za jednoobraznu prikrivenost operativca i u vidljivom i u infracrvenom spektru. Time se svojstveno smanjio karakterističan odbljesak sintetike, a posljedično se u postupku razvoja boje i štampanje pojačao mat-efekat. Ovaj materijal se po prvi put koristi u nekim oružanim snagama. Svoju primjenu u

cijelom setu uniforme su našli i laminirani i prevučeni materijali tipa Merkur i Tera.

S ovim inovativnim materijalom, ali i ostalim artiklima zadovoljene su potrebe MO i OS BiH te se planira do kraja prvog kvartala 2024. godine proizvesti 4.200

setova ljetne i setova zimske uniforme. Odjevni predmeti su zamišljeni kao setovi, izgledom su ujednačeni te su u potpunosti prilagođeni taktičko-tehničkim potrebama Oružanih snaga Bosne i Hercegovine. Novi krojevi imaju pojačanu funkcionalnost pri upotrebi i prate svjetske trendove.



NE ŠTEDEĆI SEBE, DALI MAKSIMUM DA POMOGNU TURSKOM NARODU

Shodno odluci Predsjedništva BiH, 10. februara sa lokacije kasarne OS BiH „Rajlovac“, u misiju pružanja pomoći u otklanjanju posljedica zemljotresa u Republici Turskoj, Oružane snage BiH su ispratile jedinicu privremenog sastava koja se sastojala od tima za traganje i spašavanje i tima prevodilaca turskog jezika.



U jednom od najjače zemljotresom zahvaćenog područja u turskoj provinciji Hataya, grad Antakya, jedinica kojom je komandovao pukovnik Miralem Čanić pokazala se na pravi ponos svih građana Bosne i Hercegovine.

„Ne štedeći sebe, svi su dali svoj maksimum da ublažimo bar malo tragediju naroda Republike Turske, na čemu su nam jako zahvalni“, rekao je po povratku pukovnik Čanić.

Uvježbani za pomoć stanovništvu

Svi timovi Oružanih snaga BiH koji su upućeni u Republiku Tursku završili su obuku iz oblasti pomoći civilnom stanovništvu

u vanrednim situacijama, te su bili spremni da daju maksimalan doprinos akciji pomoći narodu i državi Turskoj.

Također, medicinski tim OS BiH je spreman i u stanju pripravnosti da, u okviru sastava Balkanskih medicinskih snaga (Balkan Medical Task Force - BMTF), bude upućen u pogođena područja sa ciljem pružanja neophodne medicinske pomoći.

Na terenu, u humanitarnoj misiji u samoj Turskoj, svi pripadnici OS BiH dali su svoj maksimum na ublažavanju tragičnih posljedica na kojima su radili na osnovu prioriteta, koji su definirani od strane turske Državne agencije za elementarne nepogode (AFAD). U znak zahvalnosti za iskazani trud i zalaganje, našim pripadnicima

uručene su plakete i zahvalnice od strane Ministarstva vanjskih poslova i policije Republike Turske te aerodromskog osoblja, odakle su krenuli nazad u BiH. Nakon izuzetno teške i zahtjevne misije, svi pripadnici OS BiH su se zdravi vratili svojim kućama.

Nakon što su okončali angažman na otklanjanju posljedica u područjima pogođenim zemljotresom, jedinicu je na aerodromu dočekaio turski vojni ataše brigadir Mustafa Sitki Tatar zajedno sa pukovnicima Predragom Obrenovićem, izvršnim oficijom komandanta OK OS BiH i Dževadom Sinanovićem iz Brigade taktičke podrške OS BiH.

Ministar odbrane Bosne i Hercegovine Zukan Helez upriličio je 21. februara u Domu Oružanih snaga BiH prijem za pripadnike jedinice privremenog sastava OS BiH koji su se vratili iz humanitarne misije u Republici Turskoj.



Pripadnicima jedinice privremenog sastava OS BiH, koji su učestvovali u humanitarnoj misiji na otklanjanju posljedica od razornog zemljotresa u Republici Turskoj, uručene su pohvale i novčane nagrade. Svim pripadnicima jedinice, ministar odbrane Zukan Helez uputio je iskrene čestitke na njihovoj hrabrosti i profesionalizmu, dajući svoj maksimum na ublažavanju tragičnih posljedica.

„Novčane nagrade i pohvale više su simboličan čin zahvalnosti što ste Oružane snage BiH i čitavu svoju zemlju predstavili na najbolji mogući način, čime se svi možemo ponositi“, naglasio je Helez.



Ispružena topla ruka iz BiH

Izrazivši sreću što su se pripadnici OS BiH iz Republike Turske vratili živi i zdravi u svoju zemlju, načelnik Zajedničkog štaba OS BiH generalpukovnik Senad Mašović rekao je da je ponosan na pripadnike OS BiH koji su i mnogim drugim primjerima, a posebno u tom teškom trenutku za građane Republike Turske, dokazali i pokazali da su uvijek spremni svojim profesionalizmom i odgovornošću pružiti pomoć i odgovoriti na sve postavljene zadatke.

Prisutnima se obratio i turski vojni ataše u BiH Mustafa Sitki Tatar, koji je izrazio poštovanje i zahvalnost za svu podršku koja je pružena Republici Turskoj u ovi teškim trenucima.



„Osjetili smo toplinu i pruženu ruku od naroda iz Bosne i Hercegovine. Ova pružena ruka se nikada neće zaboraviti od naše zemlje i našeg naroda“, poručio je turski vojni ataše.

Prenoseći utiske koje su doživjeli svi pripadnici privremenog sastava OS Bosne i Hercegovine u Republici Turskoj suočavajući se sa katastrofalnim posljedicama u jednom od najjače zemljotresom zahvaćenog područja u provinciji Hataya, grad Antakya, komandir jedinice pukovnik Miralem Čanić rekao je da je ponosan na sve članove tima.

INŽINJERCI OS BiH UKROTILI RIJEKU MEŽU

Jedinica privremenog sastava OS BiH je od 14. augusta do 8. septembra 2023. pomagala civilnom stanovništvu ugroženom od velikih poplava u Republici Sloveniji.

Jedinica sastavljena od deset pripadnika iz sastava inženjerskog bataljona i glavne logističke baze, opremljena inženjerskim mašinama, bila je angažirana u općini Preljevo u Koruškoj gori na sjeveroistoku Republike Slovenije.

Jedinica je službeno ispraćena iz kasarne OS BiH „Kozara“ u Banjoj Luci, 11. augusta, a ispraćaju su prisustvovali zamjenik ministra odbrane BiH za upravljanje resursima Aleksandar Goganović, zamjenik načelnika Zajedničkog štaba OS BiH za operacije generalmajor Ivica Jerkić, komandant Operativne komande OS BiH generalmajor Radovan Ilić i drugi zvaničnici.

Uređenje riječnog korita

U skladu sa raspoloživim kapacitetima, OS BiH su angažirale Jedinicu privremenog sastava OS BiH (JPS OS BiH) koja je bila opremljena inženjerskim mašinama. Pripadnici jedinice JPS su bili angažirani na otklanjanju posljedica uzrokovanih obilnim padavinama na teritoriji Republike Slovenije uz adekvatnu mehanizaciju (dozer, kopač, dva vučna voza inženjerskih mašina i motorno vozilo za prevoz).

Po dolasku, pripadnici jedinice, koji su dobro uvježbani za ovakve situacije, bili su raspoređeni u općini Prevalje u Koruškoj



regiji na granici sa Republikom Austrijom. Konkretni zadatak jedinice bio je sanacija i uređenje korita rijeke Meže, koja se u mjestu Mrežice izlila iz korita, te njeno vraćanje u prvobitni tok.

Dobrodošlica lokalnog stanovništva

Domaćinski odnos prema učesnicima humanitarne operacije u ugroženom području pokazali su najodgovorniji predstavnici civilnih autoriteta. Ambasador Republike Slovenije u BiH Nj.E. Damjan Sedar, zamjenik gradonačelnika općine Ravne na Koroški Andrej Erjavec i direktor civilne zaštite te općine Branko Kaker su 27. augusta organizirali prijem za pripadnike OS BiH.

Ovom prilikom ambasador Sedar prenio je komandiru JPS OS BiH poručniku Nemanji Avramu utiske koje imaju zvanični predstavnici slovenskih vlasti o marljivosti i maksimalnom angažiranju kontingenta OS BiH u humanitarnoj operaciji.

Komandant OK OS BiH generalmajor Radovan Ilić je 28. i 29. augusta posjetio pripadnike Jedinice privremenog sastava OS BiH. On se u okviru posjete ovoj jedinici sastao sa predstavnicima Oružanih snaga Slovenije i predstavnicima lokalne vlasti, općina Mežica, Črna na Koroški, Prevalja i Ravne na Koroški, gdje je jedinica OS BiH učestvovala u humanitarnoj operaciji.

Najproduktivniji strani kontingent

Pripadnici JPS OS BiH su svojim nesebičnim zalaganjem u izvođenju inženjerskih radova na zadacima sanacije korita rijeke Meže zadobili povjerenje predstavnika lokalne zajednice i ostalih učesnika humanitarne operacije. Svojim zalaganjem i profesionalizmom pripadnici JPS OS BiH su od strane zvaničnih predstavnika vlasti u Sloveniji proglašeni kao najproduktivniji kontingent koji je učestvovao u humanitarnoj operaciji. Prilikom ispraćaja, nadležna komanda Oružanih snaga Slovenije je komandiru JPS OS BiH poručniku Nemanji Avramu uručila zahvalnicu.

U znak priznanja za odlično obavljen humani posao sanacije posljedica katastrofalnih poplava u Republici Sloveniji, ministar odbrane BiH Zukan Helez 2. oktobra je upriličio svečani prijem za pripadnike inženjerske jedinice privremenog sastava OS BiH. Prijemu u Domu Oružanih snaga BiH u Sarajevu su prisustvovali ambasador R. Slovenije u BiH Nj.E. Damijan Sedar, načelnik Zajedničkog štaba OS BiH generalpukovnik Senad Mašović sa zamjenikom za upravljanje resursima generalmajorom Gojkom Kneževićem, ostalim generalima OS BiH i zvaničnicima MO BiH.



MINISTAR HELEZ NA AUDIJENCIJI KOD PAPE

Zamjenik predsjedavajuće Vijeća ministara BiH i ministar odbrane Zukan Helez predvodio je delegaciju BiH, koja je 20. septembra u Vatikanu prisustvovala općoj audijenciji Svetog Oca.

Delegacija, u kojoj su bili i zamjenik ministra odbrane BiH za politiku i planove Slaven Galić i zamjenik načelnika Zajedničkog štaba Oružanih snaga Bosne i Hercegovine za resurse generalmajor Gojko Knežević, susrela se sa papom Franjom i najvišim zvaničnicima Vatikana, uključujući i drugog čovjeka u hijerarhiji Vatikana, državnog sekretara Svete Stolicе Pietra Parolina.

Poslije same audijencije, ministar Helez je razgovarao sa Papom te mu zahvalio što je Sveta Stolica uvijek podržavala Bosnu i



Hercegovinu te mir i pomirenje među njenim narodima. On je posebno zamolio Svetog Oca da iskoristi svoj uticaj da pomogne i zaštiti suverenost i nezavisnost države Bosne i Hercegovine i podrži njen put ka euroatlantskim integracijama, jer taj put nema alternativu za bolju budućnost svih njenih naroda. Nakon toga, delegacija iz BiH sastala se sa državnim sekretarom Svete Stolicе kardinalom Parolinom. U razgovoru koji je trajao 50 umjesto planiranih 20 minuta, razmatrani su odnosi BiH i Svete Stolicе, vjersko dušebrižništvo u OS BiH, kao i mogućnosti daljnje izgradnje međusobnog povjerenja u Evropi i na Zapadnom Balkanu.

Posjeta ministra UK za Evropu



Zamjenik ministra odbrane BiH za politiku i planove Slaven Galić, zajedno sa načelnikom Zajedničkog štaba generalpukovnikom Senadom Mašovićem, primio je u posjetu ministra Ujedinjenog Kraljevstva za Evropu Lea Dochertya i ambasadora Velike Britanije u BiH Juliana Reillya, 14. februara u Sarajevu.

Teme sastanka bile su bilateralna saradnja dviju zemalja vezano za programe pomoći OS BiH od strane Ujedinjenog Kraljevstva, te reforma sistema odbrane i status implementacije Pregleda odbrane i Plana modernizacije. Zamjenik ministra Galić izrazio je zadovoljstvo posjetom ministra Dochertya, naglasivši kako je ovo prilika da se razgovara o odnosima dvije zemlje te se zahvalio na kontinuiranoj podršci MO i OS BiH. Ministar Ujedinjenog Kraljevstva za Evropu Leo Docherty se zahvalio na toplom dočeku te naveo kako je njegova posjeta samo znak da UK nastavlja podršku profesionalnom razvoju OS BiH koja će se zasigurno nastaviti i u budućnosti.

MO BiH primilo ministra oružanih snaga UK

Ministar odbrane BiH Zukan Helez, sa zamjenicima Slavenom Galićem i Aleksandrom Goganovićem, 22. maja je u službeni posjetu primio ministra za oružane snage Ujedinjenog Kraljevstva Velike Britanije i Sjeverne Irske Jamesa Heappeya.

Ministar Helez je zahvalio kolegi Heappeyu na pomoći koju Vlada UK dugo godina pruža razvoju Oružanih snaga BiH, kao i putu BiH ka punopravnom članstvu u NATO savezu. Istakao je značaj projekata jačanja odbrambenih kapaciteta, školovanja oficirskog kadra, poboljšanja uslova života i rada na poligonima i kasarnama, podizanju nivoa obuke i promoviranju ravnopravnosti spolova u Oružanim snagama BiH.



Ministar Helez u Londonu sa ministrom oružanih snaga UK Heapeyem



Zamjenik predsjedavajuće VM BiH i ministar odbrane Zukan Helez, sa zamjenikom ministra odbrane za politiku i planove Slavenom Galićem, 14. septembra u Londonu se sastao sa ministrom za oružane snage Ujedinjenog Kraljevstva Velike Britanije i Sjeverne Irske Jamesom Heapeyem.

Zaključujući višednevnu posjetu Ministarstvu odbrane UK, Helez i Galić su sa Heapeyem razgovarali o mogućnostima proširenja bilateralne vojne saradnje BiH i UK te daljnjem razvoju Ministarstva odbrane i Oružanih snaga BiH. Sagovornici su izrazili zadovoljstvo dosadašnjom bilateralnom vojnom saradnjom BiH i UK, kao i spremnost da se saradnja proširi i na području zajedničkih obuka i vježbi oružanih snaga dvije zemlje.

Ministar Helez je zahvalio Heapeyju na pomoći koju Vlada UK kontinuirano pruža razvoju OS BiH, kao i putu BiH ka punopravnom članstvu u NATO savezu. On je istakao značaj projekata UK na jačanju vojnih kapaciteta, školovanja oficirskog kadra, poboljšanja uslova života i rada na poligonima i kasarnama, podizanju nivoa obuke i promoviranju ravnopravnosti spolova u OS BiH. Ranije tokom razgovora sa visokim zvaničnicima Ministarstva odbrane UK, delegaciji iz BiH je potvrđeno da će pomoć UK u okviru paketa za jačanje odbrambenih sposobnosti (DCB) BiH dostići jedan milion funti.

Sa austrijskom ministricom odbrane na promociji oficira

Ministar odbrane BiH Zukan Helez, zajedno sa ministricom odbrane Republike Austrije Klaudijom Tanner, prisustvovao je 29. septembra na Terezijanskoj vojnoj akademiji, svečanoj ceremoniji promocije kadeta, među kojima se nalazi i troje kadeta iz Bosne i Hercegovine.

Ministar Helez je prigodnim riječima izrazio zadovoljstvo povodom završetka školovanja još jedne generacije Terezijanske vojne akademije.

„Imam izuzetnu čast i zadovoljstvo prisustvovati ceremoniji završetka školovanja još jedne generacije Terezijanske vojne akademije, pogotovo što tri kadeta iz Bosne i Hercegovine uspješno završavaju svoje školovanje na ovoj prestižnoj akademiji i postaju potporučnici Oružanih snaga Bosne i Hercegovine.“ Naglasio je i

da je školovanje na ovoj prestižnoj vojnoj obrazovnoj instituciji veoma zahtjevno i teško.

„Vama i vašim porodicama čestitam na ovom postignuću, a kadetima koji se nalaze na školovanju želim da se ugledaju na svoje starije kolege i da ulože maksimalne napore da postignu tražene standarde da bi jednog dana i oni doživjeli ovakve radosne i svečane trenutke“, poručio je ministar Helez.

Na kraju, ministar Helez se zahvalio Ministarstvu odbrane Republike Austrije i Terezijanskoj vojnoj akademiji što su prepoznali potrebe sistema odbrane Bosne i Hercegovine i omogućili kadetima iz Bosne i Hercegovine da se školuju i obrazuju za obavljanje oficirskih dužnosti, uz nadu da će se ova saradnja nastaviti i u budućnosti.



Ministar Helez sa turskim ministrom odbrane Gülerom



Ministar odbrane BiH Zukan Helez se, u okviru službene posjete Republici Turskoj i prisustva 16. međunarodnom sajmu vojne industrije „IDEF 2023“, 26. jula sastao sa ministrom odbrane Republike Turske Yaşarom Gülerom. On ga je upoznao o aktuelnoj situaciji u BiH i informirao ga o stanju i aktivnostima MO i OS BiH.

Na ovom izuzetno konstruktivnom i otvorenom sastanku konstatirano je izuzetno dobra saradnja između Republike Turske i Bosne i Hercegovine, te dogovoreno niz konkretnih projekata i modaliteta pomoći od strane Republike Turske Oružanim snagama Bosne i Hercegovine. Dogovoreni oblici pomoći, podrške i saradnje odnose se na oblast školovanja naših kadeta i pripadnika Oružanih snaga BiH na vojnim učilištima u Republici Turskoj, sa posebnim naglaskom na obuku pilota helikoptera i instruktora letenja za potrebe Oružanih snaga BiH, kao i druge vidove podrške i pomoći.

Slijedom dobre saradnje sa Turskom, ministar Helez je 7. septembra ugostio zamjenika ministra odbrane Republike Turske Suaya Alpaya, koji je došao posjetiti turski kontingent EUFOR-a te održati sastanke sa zvaničnicima BiH na različitim nivoima.

Ministar Helez sa ministrom odbrane Kraljevine Norveške

Ministar odbrane BiH Zukan Helez, sa zamjenicima ministra Slavenom Galićem i Aleksandrom Goganovićem 26. septembra je u službenom posjetu primio ministra odbrane Kraljevine Norveške Bjørna Arilda Grama, koji je došao u posjetu BiH.

Ministar Helez je zahvalio kolegi Gramu na pomoći koju Norveška pruža razvoju OS BiH kroz projekte učenja engleskog jezika, pomoći u opremi za nadzor i uništavanje nestabilne municije i viškova minsko-eksplozivnih sredstava te izgradnji integriteta i podizanju nivoa obuke.

Ministar Gram je u razgovoru iskazao punu podršku BiH u ostvarenju njenih strateških vanjskopolitičkih ciljeva, te kazao da će norveška ambasada u BiH i dalje stanovnicima BiH ukazivati na korist i značaj punopravnog članstva u NATO savezu. On je najavio i daljnju pomoć u jačanju odbrambenih kapaciteta BiH, podršku u suočavanju sa savremenim prijetnjama, uključujući i kibernetičke prijetnje te finansijsku pomoć Centru za obuku za operacije potpore miru (PSOTC), kao i programe promoviranja ravnopravnosti spolova u OS BiH. Ministar Helez je posebno skrenuo pažnju na potrebu za pomoć u modernizaciji OS BiH borbenim sredstvima, kako u tome BiH ne bi zaostajala za drugim zemljama regije.



MO BiH primilo u posjetu ministra odbrane RH Banožića

Ministar odbrane BiH Zukan Helez, sa zamjenicima ministra Slavenom Galićem i Aleksandrom Goganovićem te zamjenikom načelnika Zajedničkog štaba OS BiH za operacije generalmajorom Ivicom Jerkićem, 28. septembra u službenom je posjetu primio ministra odbrane Republike Hrvatske Mariju Banožića.

Ministri Helez i Banožić potpisali su Tehnički sporazum o unapređenju saradnje MO BiH i MO RH na polju edukacije vojnih i civilnih kadrova. Kako je istaknuto, time se realizira obostrano prihvaćena obaveza sa zajedničke sjednice Vlade RH i Vijeća ministara BiH iz juna ove godine.

Glavna tema sastanka bila bilateralna vojna saradnja, koja je obostrano ocijenjena izvrsnom. Posebno je naglašeno da je data saglasnost šefu Vojnog dijela Misije BiH pri NATO-u za potpisivanje Memoranduma o razumijevanju između ministarstava odbrane BiH i RH i Vrhovne komande savezničkih snaga za Evropu (SHAPE) o realizaciji razmjene podataka o situaciji u zračnom prostoru (ASDE). Time će Republika Hrvatska sa Bosnom i Hercegovinom dijeliti vojnu sliku u zračnom prostoru, što će biti inicijalni korak u budućoj integraciji sistema kontrole i zaštite zračnog prostora BiH u jedinstveni euroatlantski sistem.

Ovo je bio treći ovogodišnji službeni susret ministara odbrane Bosne i Hercegovine i Hrvatske. Na poziv hrvatskog ministra odbrane, ministar Helez je predvodio delegaciju MO i OS BiH na Jadranskoj vojnoj i zrakoplovnoj izložbi i konferenciji (ASDA 2023) u Zadru, od 3. do 5. maja. Također, u okviru zajedničke sjednice Vijeća ministara BiH i Vlade RH, ministar Helez je 20. juna imao i odvojeni sastanak sa ministrom Banožićem.



Ministar Helez primio ministricu odbrane Kraljevine Nizozemske

Ministar odbrane Bosne i Hercegovine Zukan Helez, sa zamjenikom ministra Aleksandrom Goganovićem, 6. novembra je u službeni posjetu primio ministricu odbrane Kraljevine Nizozemske Kajsu Ollongren.

Na sastanku je razgovarano o mogućnostima jačanja bilateralne saradnje BiH i Kraljevine Nizozemske te razmijenjeni stavovi o političkoj i sigurnosnoj situaciji u Evropi i svijetu te uticaju aktuelne situacije na Zapadni Balkan.

Ministar Helez se zahvalio na različitim projektima podrške koju je nizozemska vlada pružala Bosni i Hercegovini u prošlosti, poput programa zbrinjavanja otpuštenih pripadnika Oružanih snaga BiH „Perspektiva“, kao i podršci Centru za obuku za operacije podrške miru (COOPM/PSOTC) na Butmiru. On je izrazio očekivanje da će vojna saradnja dvije zemlje postati intenzivnija, kako kroz NATO-ov paket podrške razvoju kapaciteta OS BiH tako i na bilateralnom osnovu. Naglasio je važnost nedavnog dolaska nizozemskog kontingenta kojim je pojačan EUFOR u BiH, a svi su sagovornici pozdravili činjenicu da je Vijeće sigurnosti UN produžilo mandat EUFOR-a u Bosni i Hercegovini na godinu dana.

Helez je posebno istakao važnost činjenice što je ministrica Ollongren prošle godine posjetila Potočare te iskazala pijetet žrtvama genocida u Srebrenici, kao i žaljenje što nizozemski



vojnici tada nisu mogli učiniti više na zaštiti tamošnjeg stanovništva. Ministrica Ollongren je najavila spremnost za daljim razvojem bilateralnih odnosa Nizozemske i BiH te istakla da se radi na tome da se čim prije ponovno uspostavi dužnost nizozemskog vojnog atašea na rezidentnoj bazi u Sarajevu. Naglasila je da će BiH od Nizozemske uvijek imati podršku na putu ka članstvu u Evropskoj uniji.

Ministar Helez u Crnoj Gori: „Držimo se euroatlantskog puta“

Zamjenik predsjedavajuće Vijeća ministara BiH i ministar odbrane Zukan Helez sastao se 24. maja sa predsjednikom Vlade Crne Gore Dritanom Abazovićem i ministrom unutrašnjih poslova i rukovodiocem Ministarstva odbrane Crne Gore Filipom Adžićem.



Tokom sastanka zajednički je konstatirano da su odnosi dvije zemlje prijateljski i ojačani zajedničkim vanjskopolitičkim prioritetima u pogledu regionalne saradnje i integracije u Evropsku uniju. Regionalna stabilnost i rješavanje otvorenih regionalnih pitanja bile su u fokusu razgovora, gdje je naglašeno da će zatvaranje ovih tema stvoriti prostor za ekonomiju, investicije, regionalni razvoj i turizam.

Ministar Helez se zahvalio Crnoj Gori na podršci kada su u pitanju evropske i euroatlantske integracije i predložio unapređenje saradnje u oblasti odbrane i sigurnosti i mogućnost korištenja vojnih poligona BiH od strane crnogorskih vojnika. U razgovorima je istaknuta izvanredna saradnja u okviru brojnih regionalnih inicijativa i potreba tješnje međusobne saradnje na projektima korisnim za obje zemlje, za cijeli region i na korist građana i Bosne i Hercegovine i Crne Gore.



Turska firma ASFAT realizirala ugovor o održavanju tenkova i oklopnih transportera OS BiH

Prigodnom ceremonijom u Domu Oružanih snaga Bosne i Hercegovine u Sarajevu, 18. oktobra, u prisutnosti zamjenika ministra odbrane BiH za politiku i planove Slavena Galića, ambasadora Republike Turske u BiH Nj.E. Sadika Babūra Girgina i načelnika Zajedničkog štaba OS BiH generalpukovnika Senada Mašovića, obilježena je realizacija ugovora o održavanju oklopnih transportera i tenkova OS BiH.

Prema ugovoru o nabavci rezervnih dijelova i usluzi održavanja oklopnih transportera i tenkova OS BiH, turska firma vojnopomorske industrije ASFAT iz Ankare, popravila je prva četiri američka tenka M-60A3 i četiri američka oklopna transportera M-113A2 te dostavila rezervne dijelove za preostalih 16 tenkova i 16 transportera istog tipa.

Uporedo sa radovima na popravci ovih sredstava u kasarni OS BiH „Dubrave“ kod

Tuzle, stručnjaci ASFAT-a proveli su i obuku pripadnika OS BiH za održavanje ovih sredstava, te su pripadnici OS BiH sada potpuno osposobljeni samostalno nastaviti rad na dovođenju i preostalih tenkova i transportera ovog tipa u operativno stanje. U ranijem periodu, predstavnici firme ASFAT obavili su defektažu svih tenkova i transportera, na osnovu čega su dopremili sve potrebne rezervne dijelove, neophodna ulja i maziva.

Ceremoniji su prisustvovali i pomoćnik ministra odbrane BiH za nabavku i logistiku Borislav Jezeraškić i generalni direktor firme ASFAT Esad Akgun. Uz potpisivanje dokumenta o realizaciji ugovora sa turskim vojnim atašedom u BiH brigadirom Mustafom Sitkijem Tatarom, zamjenik ministra Galić naglasio je da je podrška Republike Turske na euroatlantskom putu BiH izuzetno značajna. Posebno je istakao pomoć u školovanju kadeta i pripadnika



OS BiH u Turskoj, sa naglaskom na obuku pilota helikoptera i instruktora letenja Oružanih snaga BiH.

„Vjerujem kako će se ovakav vid odlične saradnje nastaviti i na ostalim poljima koja ubrzavaju put BiH ka euroatlantskim integracijama i koja jačaju odbrambene sposobnosti naše zemlje“, zaključio je Galić.



sredstva donirala je Vlada Republike Turske. Predstavnici firme ASFAT izrazili su zadovoljstvo organizacijom realiziranih aktivnosti, kao i profesionalnim odnosom pripadnika OS BiH. Dovođenjem u stanje pune operativnosti 20 tenkova i 20 transportera, OS BiH će značajno podići borbenu spremnost za izvršenje svoje misije, u skladu sa Zakonom o odbrani BiH.



Turski ambasador Girgin i general Mašović istakli su da ovaj projekat i turska pomoć simboliziraju snagu i neraskidivost veza BiH i Turske.

Ugovor između MO BiH i turske tvrtke ASFAT iznosio je 2,272.568 dolara, što je najveća investicija u održavanje borbene tehnike OS BiH do sada. Navedena



DVIJE DECENIJE CENTRA ZA BUDUĆNOST



U povodu 20. godišnjice djelovanja Centra za obuku za operacije podrške miru (COOPM/PSOTC) Oružanih snaga Bosne i Hercegovine, u prisutnosti ministra odbrane BiH Zukana Heleza i zamjenika ministra Slavena Galića, 18. septembra 2023. godine, u sarajevskom hotelu „Hills“, održana je svečana akademija.



Na akademiji su uz načelnika Zajedničkog štaba OS BiH generalpukovnika Senada Mašovića i njegovog zamjenika generalmajora Ivica Jerkića, učestvovali i pomoćnici ministra odbrane BiH, generalski kor OS BiH te veliki broj domaćih i stranih zvanica i vojno-diplomatskih predstavnika akreditiranih u BiH, predstavnici EUFOR-a i NATO Štaba Sarajevo, kao i predstavnici ostalih partnerskih organizacija.

U prigodnom obraćanju, ministar Helez je istakao da je u ovih 20 godina kroz ovaj centar za obuku prošlo preko 10.000 polaznika, od kojih je više od 40 posto međunarodnih, iz 65 zemalja svijeta.

„Centar za obuku za operacije podrške miru je danas bezuslovno NATO akreditiran centar koji izvodi individualnu edukaciju i obuku po svim zahtijevanim standardima NATO-a, iako nismo NATO članica, nego je on u stvari partnerski centar za obuku. Pored navedenog, centar je također član Asocijacije međunarodnih centara za mirovne operacije, Asocijacije evropskih centara za mirovne operacije te član partnerske mreže Evropskog koledža za odbranu i sigurnost“, istakao je ministar Zukan Helez.

„Svojim profesionalnim radom i djelovanjem Centar podiže reputaciju na međunarodnoj sceni kako Ministarstva odbrane i Oružanih snaga BiH, tako i države Bosne i Hercegovine. Ono što se može iskreno reći jeste da je ovaj centar svojim akreditacijama i priznanjima već odavno dio NATO saveza“, rekao je ministar Helez i zaključio da će „iskoristiti sve zakonske mogućnosti i maksimalno se zalagati za dalji napredak i prosperitet ovog centra.“

U proteklih 20 godina, PSOTC je izrastao iz malog međunarodnog projekta u uglednu instituciju koja je bezuslovno akreditirana od strane NATO-a i danas izvodi mnogobrojne kurseve za vojno osoblje, policijske službenike, kao i civilna lica iz BiH i inostranstva. PSOTC je uspostavio sistem planiranja i realizacije obuke i edukacije, koji se postupno provodi i u drugim centrima za obuku OS BiH. Svoje djelovanje u međunarodnom okruženju PSOTC ostvaruje aktivnim učešćem sve većeg broja međunarodnih polaznika, a poseban

značaj daje uspostavljeni program razmjene instruktora sa drugim međunarodnim centrima, kao i angažman mobilnog tima PSOTC-a za edukaciju i obuku, koji je do sada prenosio svoja znanja i iskustva u 17 različitih zemalja svijeta.

U nastavku obilježavanja 20. godišnjice, 19. septembar, u Sarajevu je održana tradicionalna godišnja konferencije „Prijatelji PSOTC-a 2023“.

Konferenciji je prisustvovalo više od 60 učesnika iz 21 partnerske zemlje i četiri internacionalne organizacije (OSCE, EUFOR, NATO Štab Brisel i NATO Štab Sarajevo), Ministarstvo odbrane Bosne i Hercegovine i Oružane snage Bosne i Hercegovine.

Prepoznajući značaj saradnje sa partnerima u održavanju međunarodnog mira i sigurnosti u cijelom svijetu te ulogu i težinu relevantne edukacije i obuke za buduće operacije podrške miru, Ministarstvo odbrane BiH na godišnjem nivou organizira konferenciju sa postojećim i potencijalnim budućim partnerima. Svrha konferencije bila je informiranje partnera o postignućima PSOTC-a u 2023. godini, razgovori o planovima za 2024. godinu, te razmatranje koncepta buduće saradnje u pogledu obrazovne i trening funkcije PSOTC-a u oblasti operacija podrške miru.

Konferencijom je predsjedavao pomoćnik ministra odbrane za međunarodnu saradnju Zoran Šajinović. Svečanost otvaranja uveli su svojim prisustvom zamjenik načelnika Zajedničkog štaba Oružanih snaga Bosne i Hercegovine generalmajor Ivica Jerkić, komandantica NATO Štaba Sarajevo brigadni general Pamela McGaha i komandant EUFOR-a generalmajor Helmut Hebermayer.

Glavne teme ovogodišnje konferencije prijatelja PSOTC-a bile su razmjena informacija o rezultatima koje je PSOTC postigao u prethodnom periodu i planovima za 2024. godinu, kao i razgovor o uspostavljanju mehanizama saradnje i podrške PSOTC-u.

Pomoćnik ministra odbrane BiH za međunarodnu saradnju Zoran Šajinović izrazio je zahvalnost za učešće na ovom događaju i istakao značaj konferencije ne samo za PSOTC, već i za Ministarstvo odbrane i Oružane snage BiH.

Komandant PSOTC-a brigadir Elvedin Omić sumirao je rad za period sa posljednje konferencije „Prijatelja PSOTC-a“, ističući važnost uključivanja partnera u buduće projekte PSOTC-a.



KONAČNO POVEĆAN VOJNI BUDŽET!

Povećanje budžeta je imalo pozitivan efekat na ukupan sistem jer je povećanje osnovice nakon više od deset godina djelovalo stimulativno, posebno na najosjetljivije kategorije personala u OS BiH.

U pogledu finansija, i tekuća 2023. godina započela je privremenim finansiranjem, koje je trajalo do kraja prvog kvartala. No, 30. marta usvojen je budžet za tekuću godinu. Povećan je za 21,82 posto i iznosi 392,259.000 konvertibilnih maraka. Najveći dio povećanja se odnosi na personalne troškove, obzirom da je došlo do promjene osnovice za plaću i dijela naknada.

Povećanje budžeta je imalo pozitivan efekat na ukupan sistem, jer je povećanje osnovice nakon više od deset godina djelovalo stimulativno, posebno na najosjetljivije kategorije personala u OS BiH.

Povećana i izdvajanja za MTS

Obzirom da su plate i naknade u institucijama BiH već dugi niz godina stagnirale, to se negativno odrazilo na interes mladih ljudi za apliciranje i zapošljavanje u odbrambenom sistemu, a sa druge strane je bio izražen odliv personala, jer su primanja bila izrazito nepovoljna, posebno za najniže kategorije uposlenih.

U periodu suočavanja sa izrazito visokim porastom cijena na tržištu, povećanje plata i naknada nije pratilo isti trend, ali je ipak imalo pozitivan uticaj na poboljšanje standarda, posebno vojnika u OS BiH, kao

i na povećanje interesovanja za vojnu službu, koja se zadnjih godina suočavala sa visokim odlivom personala, najvećim dijelom uzrokovano zbog niskih ličnih primanja, u odnosu na ostale nivoe vlasti i privredu.

Osim povećanja sredstava za plate i naknade, dijelom su povećana izdvajanja i za nabavku materijalno-tehničkih sredstava i usluga, što je olakšalo funkcioniranje ukupnog sistema u odnosu na prošlu godinu, koja je protekla u privremenom finansiranju i neminovnim redukcijama osnovnih nabavki, zbog nedostatka finansijskih sredstava.

I pored pozitivnog budžetskog trenda u tekućoj godini, još uvijek nivo finansiranja nije zadovoljavajući, jer su izdvajanja za odbranu oko 0,9 bruto društvenog proizvoda (GDP), što strukturu budžetskih sredstava čini nepovoljnom, sa učešćem personalnih troškova od oko 89 posto, dok su izdvajanja za kapitalne investicije niža od 2 posto.

Otežavajuća okolnost je i činjenica da je i prvi kvartal 2023. godine protekao u privremenom finansiranju, što je negativno uticalo na javne nabavke, koje zbog procedura i vremenske dinamike realizacije, nisu fleksibilne na visoke

turbulencije u nivou i dinamici finansiranja, a to se odražava na nivo realizacije ionako nedovoljnih budžetskih sredstava.

Dodatna sredstva

U tekućoj godini, Vijeće ministara BiH odobrilo je dodatna sredstva za višegodišnji projekat nabavke helikoptera u iznosu od 3,600.000 konvertibilnih maraka, koja su trebala biti odobrena iz tekuće rezerve budžeta institucija BiH do 30. septembra 2023. godine. Međutim, ona još nisu operativna za MO BiH. Također je odobren i novi višegodišnji projekat školovanja pilota (VES - avijacija), ali također dodatna sredstva još uvijek nisu odobrena, tako da projekat još nije krenuo u realizaciju.

Do kraja godine, MO BiH će pokrenuti procedure restrukturiranja budžeta, kako bi se sredstva što kvalitetnije realizirala u otežanim okolnostima koje su prethodno spomenute.

Obzirom da iz odobrenog budžeta sredstva za investiranje u kapitalne investicije za opremanje i infrastrukturu nisu dovoljna, od posebnog značaja su donacije partnerskih zemalja, posebno za nabavku vojnih sredstava i opreme, obučavanje personala i podršku infrastrukturnim projektima.



ZNOJ VOJNIKA U MIRU ŠTEDI KRV U RATU!

Vježbovne aktivnosti pripadnika Oružanih snaga BiH predstavljaju izvanredno okruženje za istovremeno izvođenje multiešalonskih aktivnosti u obuci u cilju ocjenjivanja i održavanja vještina vojnika, vođa, timova, štabova i jedinica. One simuliraju borbene uslove u obučavanju vođa pod jedinstvenim uslovima i standardima misije za primjenu najbolje taktike, tehnike i postupaka u odnosu na misiju jedinice, neprijatelja, teren i jedinice na raspolaganju.

Oružane snage BiH planiraju i realiziraju različite tipove i vrste vježbi, na operativnom i taktičkom nivou, a zajedničko za sve je da moraju biti razvijene u skladu sa ciljevima obučavanja koji su zasnovani na zahtjevima za konkretnim operativnim sposobnostima.

Cilj planiranja, učešća i realizacije vježbi OS BiH je:

- Unapređenje operativnih sposobnosti komandi i jedinica Oružanih snaga Bosne i Hercegovine za planiranje i izvršenje misija i zadataka u skladu

sa odredbama člana 4. Zakona o odbrani Bosne i Hercegovine;

- Podrška procesu ocjenjivanja komandi i jedinica Oružanih snaga BiH;
- Dostizanje standarda interoperabilnosti i operativne sposobnosti kroz integraciju jedinica koje učestvuju na međunarodnim vježbama, i
- Demonstracija operativnih sposobnosti Oružanih snaga Bosne i Hercegovine partnerima i domaćoj javnosti.

Kroz međunarodne vježbe pripadnici OS BiH (kao pojedinci i jedinice) obučavaju se za:

- Izvršavanje zadataka u operacijama podrške miru,
- Izvršavanje zadataka u konvencionalnim operacijama,
- Primjenu nesmrtonosnih oblika sile u sklopu izvođenja operacija podrške miru,
- Izvođenje logističkih operacija,
- Realiziranje zadataka u sklopu simuliranih Protivničkih snaga (OPFOR),
- Unapređenje sposobnosti za rad u multinacionalnim komandama i štabovima.

Benefiti koje OS BiH imaju učešćem u međunarodnim vježbama jesu:

- Sticanje iskustva u izvršavanju zadataka u međunarodnom okruženju,
- Uvježbavanje formacijskih jedinica u izvršavanju zadataka širokog spektra,
- Procjena nivoa osposobljenosti jedinica za izvršavanje zadataka tokom vježbi,



VJEŽBE ORUŽANIH SNAGA BOSNE I HERCEGOVINE

- Rad na štabnim pozicijama kao priprema za operacije podrške miru (OPM),
- Prilagođavanje sadržaja obuke i vježbi OS BiH međunarodnim/ NATO standardima.

Aktivni na poligonima

Pored sticanja iskustva u izvršavanju zadataka u međunarodnom okruženju, što je od posebnog značaja za jedinice deklarirane po konceptu operativnih sposobnosti, i jedinice i pojedinci (štabni oficiri) imaju jedinstvenu priliku provjeriti svoj nivo osposobljenosti u odnosu na jedinice i štabne oficire iz drugih oružanih snaga. Ova iskustva se kroz analizu te sistem naučenih lekcija pretaču u pozitivna korektivna djelovanja naših programa instrukcija i tematskih planova, te imaju uticaj na cjelokupnu obuku u OS BiH.



Rad na štabnim pozicijama tokom vježbi daje oficirima i podoficirima iznimno iskustvo i unapređuje sposobnosti, posebno za one koje se planiraju uputiti u OPM i rad u multinacionalnom okruženju.

Kao i prethodnih godina, OS BiH su i tokom 2023. godine planirale učešće u nizu međunarodnih vježbi kroz različite programe i oblike saradnje i to sa: Komandom združenih snaga Napulj, Komandom američkih snaga za Evropu i Afriku, i kroz Planove bilateralne vojne saradnje sa više evropskih zemalja. Planirano je učešće u 15 međunarodnih vježbi sa oko 150 pripadnika OS BiH.

U organizaciji Komande združenih snaga u Napulju, OS BiH su u prvoj polovini godine



učestvovala u vježbi STEADFAST COBALT 23, a do kraja godine planirano je i učešće na dvije vježbe STEADFAST JACKAL 23 i REGEX 23.

Kada su u pitanju vježbe u organizaciji Komande američkih snaga za Evropu i Afriku - USAREUR, OS BiH su zaključno sa septembrom 2023. godine, uspješno učestvovala u sljedećim vježbama: COMBINED RESOLVE 18, PLATINUM WOLF 23 i SABER JUNCTION 23. Planirana vježba IMMEDIATE RESPONSE 23, koja je bila dio vježbe DEFENDER EUROPE 23, nije realizirana u planiranom formatu.

Zbog nedonošenja odluke Predsjedništva BiH, dio međunarodne vježbe nije realiziran u BiH, te je umjesto navedene vježbe na poligonu „Manjača“ realizirana vježba OS BiH TRENUTNI ODGOVOR 23, na kojoj su učestvovali pripadnici deklariranih jedinica OS BiH. Vježba TRENUTNI ODGOVOR 23 bila je jedan od glavnih događaja obuke OS BiH u 2023. godini i uspješno je provedena od 28. maja do 2. juna na glavnom poligonu za obuku OS BiH Manjača, u skladu sa dizajnom vježbe iz Plana vježbe (EXPLAN). Vježba je planirana prema TTP 3-25.01 „Vježbe u obuci OS BiH“ na način

da omogući implementaciju procedura ocjenjivanja jedinica deklariranih kroz Program ocjenjivanja operativnih sposobnosti (OCC E&F).

Prema NATO standardima

Oružane snage BiH su iskoristile vježbu da, pored ocjenjivanja dijela deklariranih jedinica, realiziraju kurs za ocjenjivače po OCC E&F konceptu iz sastava BiH i na taj način povećaju bazu ocjenjivača OS BiH. Tokom vježbe, novi ocjenjivači su u potpunosti bili uključeni u proces ocjenjivanja. Evaluacija borbene spremnosti je realizirana kao za II nivo NATO procjene, u skladu sa standardima Savezničkih snaga ocjenjivanja borbene



VJEŽBE ORUŽANIH SNAGA BOSNE I HERCEGOVINE

spremnosti (Allied forces standards, volume VII, Combat readiness evaluation – AFS vol. VII CREVAL).

Na dijelu vježbe IMMEDIATE RESPONSE 23, koji je realiziran u Republici Hrvatskoj



učestvovala su tri pripadnika OS BiH. Vježba AGILE SPIRIT 23 je otkazana od strane organizatora i na istoj pripadnici OS BiH nisu učestvovali.

Na osnovu Planova bilateralne vojne saradnje tokom 2023. godine, OS BiH su u Republici Turskoj učestvovali u vježbama WINTER 23 i ANATOLIAN PHOENIX 23, u Republici Hrvatskoj u vježbi LAUFER 23 te u Republici Sloveniji na vježbi ADRIATIC STRIKE 23 i Italiji na vježbi GRIFONE 23. U okviru inicijative B9, do kraja godine planirano je i učešće dva pripadnika OS BiH na vježbi STRONG BALKAN 23 u Albaniji.

Tokom oktobra, a na osnovu dopune Plana obuke i saradnje između EUFOR-a

i OS BiH za 2023. godinu, održana je i zajednička vježba COMBINED RESPONSE 23/KOMBINIRANI ODGOVOR 23.

Od 21. do 29. septembra na poligonu Manjača izvedena je vježba vanjskog ocjenjivanja OS BiH DINAMIČAN ODGOVOR 23-5/6. U sklopu vježbe je izvršeno testiranje (implementacija) koncepta institucionalnog vanjskog ocjenjivanja operativnih sposobnost komandi/jedinica OS BiH, u skladu sa metodologijom NATO OCC E&F programa, koji će se primjenjivati u budućim ocjenjivanjima komandi i jedinica OS BiH, a u cilju dostizanja stepena interoperabilnosti/sposobnosti Oružanih snaga BiH, u skladu sa NATO standardima.

EOD obuka pripadnika Deminerskog bataljona brTP

U cilju realizacije događaja iz Plana bilateralne vojne saradnje za 2023. godinu SR Njemačke i BiH u periodu od 28. augusta do 8. septembra realizirana je obuka na uklanjanju eksplozivnih sredstava (EOD) u Centru za EOD obuku njemačkog Bundeswehra u mjestu Albkasarne, Stetten, SR Njemačka.

Na obuci je učestvovalo deset pripadnika čete za NUS Deminerskog bataljona Brigade taktičke podrške OS BiH, a cilj obuke se prvenstveno ogledao u sticanju novih znanja iz oblasti EOD operacija, rad u multinacionalnom okruženju, razvijanje kompatibilnosti sa specijalnom EOD opremom Bundeswehra, podizanje borbene spremnosti i razvijanje trenutnih EOD kapaciteta OS BiH.

Tokom realizacije navedene obuke, pripadnici čete za NUS su pokazali jako visok nivo profesionalizma i vojničkog ponašanja, nivo dosadašnje obučenosti i uvježbanosti u reakciji na improvizirane eksplozivne naprave i druge EOD incidente, pravilno i svrsishodno rukovanje sa specijalnom EOD opremom i alatima, visok stepen usklađenosti standarda OS BiH sa standardima NATO-a iz oblasti EOD i drugih operacija.

Pored redovnih vojničkih zadataka, četa za NUS je u svom dosadašnjem radu pokazala izvanredne rezultate koji se ogledaju kroz otklanjanje opasnosti od municije i minsko-eksplozivnih sredstava u Bosni i Hercegovini zaostalih iz proteklog rata kako na vojnim tako i na civilnim lokacijama (kroz asistenciju civilnim strukturama vlasti), učešće u međunarodnim operacijama podrške miru, uništavanje viškova nestabilnih eksplozivnih sredstava u BiH i višestrukoj realizaciji nacionalnih i internacionalnih vojnih vježbi u sklopu elementa EOD podrške. Ovakvi i slični vidovi obuke doprinose kontinuiranom razvijanju EOD kapaciteta OS BiH koji su od ranije prepoznati u širem regionu.

Realiziran Napredni kurs odnosa s javnošću

U organizaciji Ureda za odnose s javnošću MO BiH realiziran je Napredni kurs odnosa s javnošću, u periodu od 23. do 27. oktobra u Domu OS BiH.

Na kursu je učestvovalo 15 pripadnika Oružanih snaga koji obavljaju dužnosti oficira za odnose s javnošću u svojim matičnim jedinicama. Kurs je pružio priliku polaznicima da kroz kombinaciju teorijskih i praktičnih vježbi unaprijede svoje kompetencije i steknu znanja iz oblasti javnog nastupa, rada sa medijima, reagiranja u nepredviđenim i kriznim situacijama, a koje će moći implementirati u daljnjem radu.

Napredni kurs odnosa s javnošću namijenjen je oficirima koji su uspješno završili Osnovni kurs odnosa s javnošću i realizira se u svrhu poboljšanja rada u oblasti odnosa s javnošću u Oružanim snagama BiH.

Uvjerena o uspješno završenoj obuci su dodijelili Uma Sinanović i pukovnik Suvad Rogo iz Ureda za odnose s javnošću MO BiH, koji su bili instruktori i realizatori kursa, pored Antonija Prlende i asistentata kapetana Milice Blagojević i potporučnika Gordane Pećanac.

Inače, Osnovni kurs odnosa s javnošću, u organizaciji Ureda za odnose s javnošću, prethodno je održan od 15. do 19. maja u kasarni „Rajlovac“.



Obuka u zimskim uslovima Voda za dubinsko osmatranje

Na lokalitetu kasarne „Rajlovac“ OS BiH je od 30. januara do 3. februara uspješno završena obuka Voda za dubinsko osmatranje iz sastava Vojnoobavještajnog bataljona Brigade taktičke podrške OS BiH.

Ova aktivnost je realizirana u skladu sa smjernicama komandanta i prema godišnjem planu obuke Vojnoobavještajnog bataljona za 2023. godinu, sa ciljem održavanja i unapređenja spremnosti ove jedinice za pružanje vojnoobavještajne podrške tokom izvođenja operacija.

Sami vremenski uslovi na terenu su pogodovali realizaciji obuke u realističnim i otežanim zimskim uslovima tokom kojih su pripadnici voda uvježbavali taktičke radnje poput: maskiranja, taktičkog kretanja, marševanja i izviđanja u vremenskim uslovima. Fokus obuke je bio na uspostavljanju baznog kampa i boravku jedinice u ekstremnim uslovima, a uvježbavane su i tehnike spašavanja i pružanja prve pomoći. Završnicu obuke je obilježila i situacijska vježba tokom koje su integrirane sve prethodno uvježbane taktičke radnje.

Obuka Voda za dubinsko osmatranje se izvodi tokom cijele godine u svim vremenskim uslovima kako bi se ova jedinica što bolje obučila za izvršavanje svoje misije uz naglašen timski rad. Najbolji pokazatelji njihove obučenosti su mnogobrojna učešća na međunarodnim izviđačkim događajima.

Kibernetička odbrana i mrežna sigurnost

Pripadnici MO i OS BiH iz sastava Ekspertskog tima za upravljanje računarskim incidentima, od 11. do 15. septembra realizirali su još jednu aktivnost u nizu aktivnosti iz programa „Mil-to-mil“ (Vojska-Vojsci) u oblasti kibernetičke sigurnosti pod nazivom „Cyber Defense and Network Security“, a u saradnji sa pripadnicima 169. tima za kibernetičku zaštitu Nacionalne garde Marylanda, SAD. Navedena aktivnost realizirana je u Sarajevu.

Cilj aktivnosti bio je nastavak obuke pripadnika Ekspertskog tima za upravljanje računarskim incidentima MO i OS BiH, u korištenju alata za praćenje i procjenu ugroženosti kibernetičke sigurnosti. Članovi 169. tima za kibernetičku zaštitu Nacionalne garde Marylanda, SAD, radili su s pripadnicima MO i OS BiH na usvajanju novih znanja i vještina koje treba da unaprijede opću kibernetičku sigurnost u MO i OS BiH.

Tokom realiziranja pomenute aktivnosti usklađene su ideje i ciljevi te definirani konkretni koraci koji će se poduzeti u narednom periodu. Nacionalna garda Marylanda od 2018. godine podržava prenos znanja i razvoj novih vještina pripadnicima MO i OS BiH iz domena kibernetičke sigurnosti kroz Državni partnerski program (SPP) Vlade SAD-a.



BiH S PUNIM PRAVOM MOŽE BITI PONOSNA NA SVOJE GRAĐANE U UNIFORMI

Kada se pogleda period od 2019. do danas, može se reći da je stanje ljudskih prava i osnovnih sloboda u OS BiH zadovoljavajuće, a u pojedinim segmentima i poboljšano.

Ured parlamentarnog vojnog povjerenika BiH uspostavio je dobru praksu neposredne komunikacije sa profesionalnim vojnim licima, te s tim u vezi pripadnici i pripadnice Oružanih snaga BiH mogu vojnog povjerenika kontaktirati telefonskim putem, putem e-maila, ili dolaskom u Ured.

Unutar svojih nadležnosti, vojni povjerenik postupa povodom pojedinačnih ili grupnih pritužbi, obavještava profesionalna vojna lica o njihovim pravima, upoznaje ih o mogućnosti sudske i druge zaštite, predlaže pokretanje postupaka i drugo.

Ured parlamentarnog vojnog povjerenika nezavisno je tijelo Parlamentarne skupštine Bosne i Hercegovine (PS BiH), uspostavljeno u cilju unapređenja vladavine prava te zaštite ljudskih prava i sloboda vojnih lica i kadeta u Oružanim snagama i Ministarstvu odbrane BiH.

Zaštita ljudskih prava

Koji su bili najveći izazovi po pitanju zaštite ljudskih prava u OS BiH u protekloj 2022. godini?

U godišnjem Izvještaju o radu parlamentarnog vojnog povjerenika BiH, koji je usvojila Parlamentarna skupština BiH, navedene su oblasti u kojima su evidentirane pritužbe profesionalnih vojnih lica, a to su:

- pritužbe koje se odnose na obavljanje dužnosti drugog formacijskog mjesta u periodu dužem od 30 dana,
- pritužbe u vezi sa prijemom po preporuci komandanta u početnom činu podoficira,
- pritužbe koje se odnose na mogućnost postavljenja na više formacijsko mjesto,
- vođenje disciplinskih postupaka protiv profesionalnih vojnih lica.

Osim ovih oblasti, u komandama i jedinicama OS BiH bile su prisutne teškoće, koje su nažalost evidentirane i tokom 2023. godine, a odnose se na:

- personalnu popunjenost,
- teškoće po pitanju ishrane profesionalnih vojnih lica u pogledu velikog odstupanja od plana i pravilnika o ishrani,
- nedostatak svih klasa materijalnih sredstava (I-X), pri čemu je posebno izražena činjenica da nema kontinuiteta u nabavci i distribuciji istih u kasarnama i jedinicama OS BiH,
- teškoće u termoelektričkim postrojenjima i obezbjeđenju energenata za grejnu sezonu, što je višegodišnji problem.

S Vama smo za "Našu vojsku" radili intervju 2019. godine. Kakva je situacija po pitanju ljudskih prava u OS BiH danas, u odnosu na tu 2019. godinu?

U 2020. godini posebno su bili izraženi problemi u vezi sa evidentiranim nepravilnostima u procesu odabira kandidata za odlazak u misije mira, te ostvarivanje prava koja proizilaze iz obaveze obavljanja dužnosti višeg formacijskog mjesta u odnosu na lični čin.

Poseban segment mogeg rada u ovom periodu bio je i praćenje epidemioloških mjera koje su provođene na lokacijama OS BiH, s ciljem zaštite života i zdravlja profesionalnih vojnih lica u okolnostima pandemije COVID-19.

Kao parlamentarni vojni povjerenik BiH, uprkos svim teškoćama, konstatirao sam da su se MO BiH i ZŠ OS BiH krajnje odgovorno odnosili prema propisanim epidemiološkim mjerama, te su ulagali maksimalni naponi kako bi se mogućnost širenja virusa tokom pandemije COVID-19 svela na najmanju moguću mjeru. Međutim, s obzirom na način organizacije rada OS BiH, uprkos svim preduzetim epidemiološkim mjerama, tokom pandemije zaražena su 762 lica, dok je od posljedica zaraze korona virusom, nažalost, preminulo devet pripadnika OS BiH.

Kada se pogleda period od 2019. do



danas, može se reći da je stanje ljudskih prava i temeljenih sloboda u OS BiH zadovoljavajuće, a u pojedinim segmentima i poboljšano. Ured parlamentarnog vojnog povjerenika BiH u proteklom periodu evidentira smanjenje broja pritužbi, a što je uslovljeno činjenicom da je obustavljeno slanje pripadnika OS BiH u Misiju mira u Islamsku Republiku Afganistan. Također, zajedničkim, preventivnim djelovanjem s Generalnim inspektoratom MO BiH, u pogledu praćenja svih faza testiranja i provođenja konkursne procedure prijema u OS BiH, smanjen je prostor za podnošenje pritužbi i vođenje istraga. Posebnu sam pažnju posvetio primjeni instituta "posredovanja", u skladu sa zakonskim ovlaštenjima, te je kroz segment pružanja pravne pomoći profesionalnim vojnim licima uticao na otklanjanje uočenih kršenja njihovih prava bez provođenja istražnog postupka.

Kako ocjenjujete situaciju u OS BiH na polju ravnopravnosti spolova i zaštite prava žena, pripadnica OS BiH?

Procenat zastupljenosti žena u OS BiH iznosi 9,2 posto, pri čemu se mora istaći i pozitivan primjer 5. pješađijske brigade, u kojoj je zastupljenost žena preko 11 posto.

I dalje je mali procenat pripadnica OS BiH u kategoriji oficira, a posebno broj žena procentualno opada u postupku unapređenja u više činove. MO BiH i OS BiH u ovom dijelu u budućnosti trebaju uložiti dodatne napore, kako bi se u postupku vođenja u karijeri kroz edukacije i usavršavanja, dao prostor većem broju žena za unapređenje u više činove.

Također, potrebno je aktivnije uključiti pripadnice OS BiH u rad raznih komisija na kojima se donose odluke, a što je vojni povjerenik posebno obradio u svom Izvještaju o radu iz 2021. godine. Iako su napravljeni značajni pomaci u pravcu unapređenja uslova boravka i smještaja pripadnica OS BiH u kasarnama, i dalje treba dosta uraditi kako bi se ti uslovi

dodatno unaprijedili, te na svim lokacijama osigurali adekvatni prostori za njihov boravak.

Šta smatrate svojim najvećim uspjehom na dužnosti parlamentarnog vojnog povjerenika BiH?

Ured parlamentarnog vojnog povjerenika BiH uspostavio je dobru praksu neposredne komunikacije sa profesionalnim vojnim licima, te s tim u vezi, vojnog povjerenika mogu kontaktirati telefonskim putem, putem e-maila, ili dolaskom u kancelariju. Do sada su sva profesionalna vojna lica, koja su iskazala potrebu, primljena u kancelariji i s njima je obavljen razgovor.

Kao poseban uspjeh moram istaći i unapređenje transparentnosti mnogih procesa u MO i OS BiH, počevši od obaveze da nadležni u MO i OS BiH pismeno odgovore po žalbama pripadnika OS BiH, do objavljivanja rang lista prilikom procesa unapređenja, prijema, školovanja, i sl. Što su procesi transparentniji i rezultati rada onih koji odlučuju vidljiviji, time se više jača povjerenje u profesionalizam OS BiH, te smanjuje prostor za nezadovoljstvo i žalbe. Tokom svog rada uvijek sam isticao da principi jednakih mogućnosti, zakonitosti i transparentnosti, moraju biti imperativ u procesu vođenja karijere profesionalnih vojnih lica, a vjerujem da je to imperativ i odgovornih u MO i OS BiH.

Također, svoj dosadašnji rad, osim postupanja po pritužbama, snažno sam bazirao na terenskim posjetama komandama i jedinicama OS BiH. Tokom ovih posjeta i razgovora sa komandantima, uvijek sam ostavljao prostora za susrete i razgovore posebno sa svim kategorijama profesionalnih vojnih lica, jer svaka kategorija: vojnici, podoficiri i oficir, imaju svoje specifične potrebe i izazove sa kojima se suočavaju u svakodnevnom radu. Sastavni dio svake posjete bio je i obilazak svih prostorija u kojima žive i rade profesionalna vojna lica što uključuje učionice, trpezarijske blokove, spavonice, stražarska mjesta, dvorišni krug lokacije, toalete, pri čemu sam na svakoj lokaciji posebno utvrđivao da li su osigurani zasebni toaleti za pripadnike OS BiH.

Jasan cilj

Ovakva praksa nije uvijek imala pozitivan odjek među odgovornim u MO i OS BiH, ali moj cilj je uvijek bio jasan: na licu mjesta, a ne iz papira, uvjeriti se u kakvim uslovima žive i rade pripadnici OS BiH, sa kojim se to teškoćama susreću, te šta se u tom pravcu može unaprijediti. Moram istaći da sam u ovim aktivnostima imao i imam snažnu podršku Zajedničke komisije za odbranu i sigurnost BiH, koja je na osnovu izvještaja Ured parlamentarnog vojnog povjerenika BiH dobijala informacije o stvarnom stanju na terenu.

Dosta rada je iza mene, moram reći i dosta uspješnih aktivnosti, a među posljednjom

želim istaći da su na osnovu preporuke parlamentarnog vojnog povjerenika BiH od 7. marta 2023. godine, koja se odnosi na korištenje društvenih mreža od strane profesionalnih vojnih lica, MO BiH i Generalni inspektorat MO BiH organizirali radionicu i pripremili nacrt Kodeksa ponašanja pripadnika MO i OS BiH na društvenim mrežama i online platformama.

Desetine preporuka, veliki broj pozitivno riješenih pritužbi u korist podnosioca, pružene pravne pomoći, kontinuirana komunikacija sa profesionalnim vojnim licima, sve ovo izgradilo je snažno povjerenje u instituciju parlamentarnog vojnog povjerenika BiH. Potvrda toga jeste značajan broj pismenih i usmenih

zahvalnica profesionalnih vojnih lica.

U proteklom periodu pokrenut je niz inicijativa sa Zajedničkom komisijom za odbranu i sigurnost Parlamentarne skupštine BiH i Generalnim inspektoratom MO BiH, s ciljem poboljšanja statusnih pitanja profesionalnih vojnih lica, pri čemu je za ostvarivanje ovog cilja potrebno još puno raditi.

Na kraju, ništa manje važno, želim s ponosom istaći da je Bosna i Hercegovina bila domaćin 11. svjetske konferencije ombudsmana za oružane snage, koja je 2019. godine održana u Sarajevu, čime je institucija parlamentarnog vojnog povjerenika BiH dobila važno priznanje u međunarodnim okvirima.

Osvrt parlamentarnog vojnog povjerenika BiH na trenutno stanje

U vezi sa trenutnim stanjem posebnu zabrinutost izražavam o sljedećim pitanjima:

- trenutno nema ugovora za osnovno održavanje, servisiranje, remont i sanaciju termo-energetskih postrojenja na određenim lokacijama OS BiH, zbog čega je 27 objekata na tim lokacijama dočekalo grejnu sezonu nespremno. Na svu sreću, vremenske prilike i temperature u ovom jesenjem periodu su nam blagonaklone, te se nadamo da će do zahlađenja ovaj problem biti riješen;
- još uvijek je izražen problem nedovoljne personalne popunjenosti jedinica OS BiH, a direktnu posljedicu toga snose profesionalna vojna lica koja nerijetko obavljaju više dodatnih dužnosti zbog nepopunjenosti predviđenih formacijskih mjesta;
- nedostatak materijalno-tehničkih sredstava i materijalnih sredstava svih klasa, a poseban problem je odsustvo kontinuiteta u nabavci i distribuciji ovih sredstava. Teškoće na koje kao parlamentarni vojni povjerenik BiH uvijek skrećem pažnju jesu ishrana profesionalnih vojnih lica na lokacijama, kontinuitet nabavke prehrambenih artikala i distribucija istih, te poštivanje Pravilnika o ishrani.

Međutim, bez obzira na iznesene teškoće, smatram da su OS BiH opravdale svoje postojanje, te da su pripadnice i pripadnici OS BiH svojim predanim, odgovornim i profesionalnim radom pokazali i dokazali da su sposobni nositi se sa svim izazovima i zadacima koji im se dodjeljuju. Potvrda toga su njihovi izuzetni uspjesi u misijama mira, pomoći civilnom stanovništvu, procesu deminiranja, vojnim vježbama i edukacijama, te brojne pohvale i nagrade za njihov rad i angažman. Bosna i Hercegovina s punim pravom može biti ponosna na svoje građane u uniformi.

Kako bi se angažman OS BiH osnažio u njihovoj ulozi deminiranja, pomoći civilnom stanovništvu i lokalnim zajednicama, neophodno je osigurati bolju opremljenost jedinica OS BiH, te poboljšati uslove smještaja. Naime, dosadašnji angažman profesionalnih vojnih lica u brojnim akcijama djelovanja tokom poplava, požara i zemljotresa kako u Bosni i Hercegovini, tako i u drugim zemljama bio je izuzetan i vrijedan svake pažnje.

U procesu zaštite ljudskih prava i temeljnih sloboda pripadnica i pripadnika OS BiH posebno moram naglasiti dobru i profesionalnu saradnju sa Generalnim inspektoratom MO BiH i brigadnim generalom Mirsadom Ahmićem. Zajedničkim radom do sada smo uspjeli otkloniti brojne nepravilnosti, te preventivnim djelovanjem spriječiti kršenja prava u pojedinčanim slučajevima.

Na kraju, moram istaći da mi je neostvareni cilj uvođenje stražarskog dodatka i dodatka za učešće na vježbama, te se nadam da će se i rješavanju tog pitanja proaktivnije pristupati. Također, želio bih da se više pažnje posvećuje pripadnicama i pripadnicima OS BiH koji rade na terenu, te njihovim potrebama, jer nije isti rad u kancelarijama, i rad na stražarskim mjestima, radio-relejnim čvorištima, te raznim poligonima. Lično sam se u to uvjerio, pa je ovo ujedno i poziv nadležnim u MO i OS BiH da intenziviraju posjete ovakvim lokacijama i razgovaraju sa profesionalnim vojnim licima na terenu.

POZITIVAN TREND U IMPLEMENTACIJI PARTNERSKIH CILJEVA

I pored ograničenja sa budžetom, u nekoliko oblasti učinjen je značajan napredak u ispunjavanju usaglašenih ciljeva saradnje sa Sjevernoatlantskim savezom (NATO).

NATO Proces planiranja i revizije (PARP)

Na osnovu člana 15. tačka a) Zakona o odbrani BiH i preuzetih obaveza BiH u Procesu planiranja i revizije (PARP), u periodu april – juni 2023. godine realizirana je izrada dokumenta „PARP procjena za 2023. godinu“, koji je dostavljen u Vojni dio NATO misije BiH u junu mjesecu. U mjesecu julu, u Domu OS BiH u Sarajevu, održan je sastanak sa predstavnicima Glavnog štaba NATO.

Tokom procjene, potvrđeno je da je, i pored teške situacije i ograničenja sa budžetom, u nekoliko oblasti učinjen značajan napredak u ispunjavanju usaglašenih ciljeva naše saradnje. Zadržan je pozitivan trend u području implementacije partnerskih ciljeva (PG).

Takođe, 10. novembra tekuće godine planiran i završni sastanak u formatu 30+, a koji će se održati u Glavnom sjedištu NATO u Briselu, na kojem će se još jednom razmotriti dokument PARP za BiH te, nakon toga, eventualno i usvojiti. Trenutni set uključuje 35 PG-a. Za implementaciju

34 PG nadležno je MO i OS BiH, dok je za jedan direktno odgovorno Ministarstvo sigurnosti BiH.

Koncept operativnih sposobnosti - OCC E&F Program

U okviru PARP-a, od posebnog je značaja naš razvoj Operativnog koncepta sposobnosti - OCC.

Primarni fokus je naša deklarirana bataljonska grupa lake pješadije, koja broji 840 ljudi sa pratećom opremom (što je 10% ljudskih resursa OS), a koja je nakon uspješno završenog ocjenjivanja kao „Borbeno spremna“ u bazenu snaga, i ista održava nivo spremnosti.

Pored učešća sa deklariranim jedinicama, MO i OS BiH učestvuju u okviru OCC E&F koncepta u sastavu NATO MTT za obuku ocjenjivača i rukovalaca bazom podataka, kao voditelji kurseva i instruktori. U 2022. i 2023. godini učestvovali smo u sastavu NATO MTT u Kataru, Tunisu, Maroku i Kazahstanu. Također, naši ocjenjivači učestvuju na ocjenjivanjima jedinica

iz drugih država koje su u OCC E&F programu. U 2023. godini učestvovali smo u ocjenjivanjima u Azerbejdžanu, Armeniji, Austriji, Irskoj, Kataru i Srbiji.



NATO Program unapređenja edukacije u odbrambenom sektoru (DEEP)

NATO Program unapređenja edukacije u odbrambenom sektoru (Defence Education Enhancement Program - DEEP) pruža priliku da partnerske zemlje uz pomoć NATO-a izvrše reviziju sistema karijerne i drugih vrsta obuke, sagledaju stanje i unaprijede sposobnosti instruktorskog kadra, te planove i programe karijernih kurseva podoficirskog i oficirskog kadra, koji su kompatibilni sa sistemom vojnog školstva u zemljama članicama NATO. BiH je pristupila DEEP programu 2019. godine.

U toku je implementacija Akcionog plana po programu DEEP BiH za 2023. godinu, koja obuhvata 20 aktivnosti, odnosno seminare, radionice i obuke nastavnog osoblja u zemlji i inostranstvu koje predvode NATO DEEP timovi. Realizacija teče po planu.

Nadalje, NATO DEEP je tokom provođenja svojih aktivnosti identificirao instruktorsko osoblje iz OS BiH za koje je zatražen i odobren angažman za učešće u timu za revidiranje postojećeg NATO kurikuluma za podoficirsku obuku.





NAŠI VOJNICI U MOBILNIM TRENING TIMOVIMA NATO-a

U toku 2023. godine pripadnici OS BiH aktivno su učestvovali na 18 NATO OCC E&F događaja, kako u ulozi instruktora tako i u ulozi ocjenjivača gdje su imali vodeće dužnosti u ocjenjivačkim strukturama.

Bosna i Hercegovina i njene oružane snage su od velikog značaja za NATO savez kao partner koji dijeli zajedničke ciljeve mira, stabilnosti i sigurnosti. Implementiranje OCC E&F programa u OS BiH, kao i učešća pripadnika Oružanih snaga BiH, certificiranih ocjenjivača po NATO standardima u ocjenjivanju partner država, kao što su: Katar, Tunis, Kazahstan, Armenija, Maroko, Austrija i Srbija, svakako je ključno za jačanje sposobnosti OS BiH u cilju ispunjenja zadate misije, kao i ispunjenja svih jasno definiranih obaveza propisanih Zakonom o odbrani BiH.

Dostignuta interoperabilnost i sposobnost Oružanih snaga Bosne i Hercegovine je ključni element učešća u NATO OCC E&F MTT aktivnostima. OCC E&F se u konačnici odnosi na sposobnost vojski različitih zemalja (članica NATO-a i partnera) da zajedno rade, komuniciraju, učestvuju u zajedničkim obukama i vježbama, kako bi bile spremne za učešće u eventualnim operacijama, a završna faza je ocjenjivanje spremnosti u skladu sa NATO standardima. Učešćem u ocjenjivanju partner država, OS BiH stiču neophodno i vrijedno iskustvo.

Posebno treba istaknuti učešće OS BiH u NATO OCC E&F Mobile Training Team (MTT) programu. MTT je inicijativa koja omogućava NATO saveznicima i partnerima da dijele svoje stručno znanje i iskustvo u različitim područjima, uključujući vojnu obuku, planiranje operacija i upravljanje resursima, a u konkretnom slučaju veliko i priznato iskustvo koje imaju OS BiH u implementaciji OCC E&F programa. Ujedno ovo je izvanredna prilika za OS BiH da unaprijedi svoje sposobnosti i obogate svoje znanje, čime se postiže veća posvećenost NATO putu.

Učešće u NATO OCC E&F MTT programu također doprinosi jačanju odnosa između OS BiH i drugih partnera i saveznika. Kroz ovaj program, instruktori OS BiH imaju priliku raditi rame uz rame sa instruktorima i vojnicima iz drugih zemalja i razmijenjivati znanje i iskustva. Ovo jača povjerenje i saradnju među partnerima i pomaže u izgradnji mreže kontakata unutar NATO saveza. Također, treba napomenuti da učešće u ovim aktivnostima potvrđuje posvećenost Bosne i Hercegovine NATO putu. Iako BiH nije članica NATO-a, ova posvećenost predstavlja važan korak prema potpunoj integraciji u euroatlantske strukture.





MINISTAR HELEZ U BRISELU: BROJNI SASTANCI SA ZVANIČNICIMA EU

Ministar odbrane BiH Zukan Helez je 18. i 19. jula boravio u Briselu, gdje je imao službene sastanke sa istaknutim zvaničnicima Evropske unije.

Helez se sastao sa povjerenikom Evropske komisije za susjedstvo i proširenje Olivérom Várhelyijem, a nakon toga sa visokim predstavnikom Evropske unije za vanjske poslove i sigurnosnu politiku i potpredsjednikom Evropske komisije Josepom Borrellom.

Također, drugog dana posjete, ministar Helez je predvodio delegaciju MO BiH na petom sastanku Vijeća za stabilizaciju i

pridruživanje između BiH i EU, na kojem je učestvovao na poziv kosekretara ovog vijeća, Barbare Latko.

Posjeta Briselu iskorištena je i za još nekoliko službenih sastanaka na kojima se razgovaralo o putu BiH ka euroatlantskim integracijama i ispunjenju 14 preduslova za otpočinjanje pregovora o punopravnom članstvu BiH u EU.



Ministar Helez u Bijeloj kući, State Departmentu, Pentagonu...

Ministar odbrane BiH Zukan Helez je, počevši od 11. aprila, imao intenzivnu višednevnu posjetu SAD-u. U Bijeloj kući u Washingtonu se sastao sa koordinatoricom Vijeća za nacionalnu sigurnost za odbrambenu politiku i kontrolu naoružanja Carom Abercrombie. Ona je naglasila je čvrstu opredijeljenost Vlade SAD na pružanju podrške BiH na putu ka EU i NATO.

„Pomoći ćemo sve reformske procese u MO i OS BiH i pozdravljamo usaglašeni prijedlog strukture novog generalskog kora. Pentagonu ću prosljediti na razmatranje inicijativu da se u BiH poveća prisutnost američkih snaga“, naglasila je.

Ministar Helez se u State Departmentu susreo sa glavnim zamjenikom pomoćnika

državnog sekretara Stanom Brownom, sa kojim je razmijenio mišljenje o trenutnoj političkoj i sigurnosnoj situaciji u Bosni i Hercegovini i blokadama pojedinih članova kolektivnog šefa države našeg puta ka euroatlantskim integracijama. Na kraju dana je imao izuzetno korisnu posjetu Pentagonu i susret sa Colinom Kahlom,

zamjenikom sekretara Ministarstva odbrane za politiku SAD-a.

Također, Helez se sastao sa direktorom Kancelarije za južne i centralnoevropske poslove u State Departmentu Martinom McDowellom. Razgovarali su o sigurnosnoj i političkoj situaciji u BiH i regiji, kao i procesu konstituiranja vlasti u našoj zemlji. Istoga dana, ministar se susreo sa direktoricom razvojnih programa Instituta Marshall Legacy (MLI) Indreom Sabaliunaite. Ona je iskazala interes da se, u saradnji sa Centrom za obuku pasa za otkrivanje mina u BiH (MDDC) i Međunarodnim trust fondom (ITF), u 2023. godini provede projekat „Mostar bez mina“, čija je realizacija započela krajem 2021. godine.

Također, Helez je razgovarao i sa predstavnicama organizacije BHeart, koja okuplja volontere porijeklom iz BiH, koji pomažu projekte važne za bosanskohercegovačku zajednicu. Helez je posjetio i američku saveznu državu Maryland, sa kojom je BiH ove godine obilježila 20 godina partnerstva.



Razgovori sa visokom delegacijom Ministarstva odbrane SAD

Ministar odbrane BiH Zukan Helez sa zamjenicima Slavenom Galićem i Aleksandrom Goganovićem primio je 27. juna u službenom posjetu delegaciju Ministarstva odbrane Sjedinjenih Američkih Država, na čelu sa prvom zamjenicom pomoćnika ministra odbrane SAD za međunarodnu sigurnost Tressom Guenov.



Delegacije su razgovarale o bilateralnoj vojnoj saradnji BiH i SAD-a, kao i sigurnosnoj situaciji u Evropi i regiji. Vodstvo američke delegacije istaklo je da je Bosna i Hercegovina važan partner za SAD te da veze između ove dvije zemlje treba još dublje razvijati. Analizirani su dosadašnji projekti bilateralne vojne saradnje te razmatrane mogućnosti za nove slične projekte na polju obuke, modernizacije i razvoja Oružanih snaga BiH.

Prva zamjenica pomoćnika ministra odbrane SAD za međunarodnu sigurnost Tressa Guenov pozdravila je zajedničke napore menadžmenta MO BiH na poboljšanju statusa pripadnika i modernizaciji OS BiH. Pokazala je spremnost SAD-a za daljnjom podrškom izgradnji odbrambenih kapaciteta BiH kroz zajednički paket NATO-a, koji obuhvata devet projekata na polju odbrane i tri iz sigurnosti.

Ministar Helez sa pomoćnikom generalnog sekretara NATO-a

Ministar odbrane BiH Zukan Helez je 26. aprila u službenom posjetu primio pomoćnika generalnog sekretara NATO-a za obavještajne i sigurnosne poslove Davida Cattlera.

Sagovornici su razgovarali o putu BiH ka punopravnom članstvu u NATO-u, ali i izazovima sa kojima se suočavaju MO i OS BiH. Razgovarano je i o složenim političkim odnosima u zemlji i regiji.

Ministar Helez je istakao važnost odgovornosti kojeg domaći političari imaju prema sigurnosti svih građana te naglasio da put BiH ka punopravnom članstvu u NATO-u i Evropskoj uniji nema alternativu. Zahvalio je svom gostu na pomoći kojeg NATO pruža Oružanim snagama BiH kroz paket jačanja odbrambenih kapaciteta, ali i istakao kako se nada da će se ta pomoć proširiti.

Pomoćnik generalnog sekretara NATO-a Cattler je naglasio da će NATO savez i dalje pomagati Bosnu i Hercegovinu na njenom putu ka dostizanju demokratskih standarda u okvirima kolektivnog sistema sigurnosti, na korist svih stanovnika BiH te i dalje podržavati Snage Evropske unije (EUFOR) u BiH u čuvanju mira i stabilnosti u zemlji.



Pomoćnik generalnog sekretara NATO-a posjetio MO BiH

Ministar odbrane BiH Zukan Helez, zajedno sa zamjenikom ministra Aleksandrom Goganovićem, 30. augusta u službenom posjetu primio pomoćnika generalnog sekretara NATO-a za operacije Thomasa Goffusa.

Razgovarano je i o složenim političkim odnosima u zemlji i regiji. Helez se posebno zahvalio na pomoći koju NATO pruža Oružanim snagama BiH kroz paket jačanja odbrambenih kapaciteta (DCB).

Goffus je čestitao ministru Helezu na svemu što aktuelni sastav MO BiH čini na razvoju OS BiH. Naglasio je da će NATO predano raditi na realizaciji paketa pomoći za daljnju izgradnju kapaciteta OS BiH, ali je istakao da za svako sredstvo u okviru tog paketa pomoći mora imati saglasnost svih članica NATO-a.



20. godišnjica partnerstva sa Marylandom

U povodu obilježavanja 20. godišnjice Programa državnog partnerstva (SPP) Bosne i Hercegovine i američke savezne države Maryland, u prisutnosti visokih delegacija Ministarstva odbrane i Oružanih snaga BiH te Nacionalne garde Maryland, 19. juna u sarajevskom Domu OS BiH održana je svečana akademija.

Domaćin svečane akademije bio je ministar odbrane BiH Zukan Helez, zajedno sa zamjenicima Slavenom Galićem i Aleksandrom Goganovićem te načelnikom Zajedničkog štaba OS BiH generalpukovnikom Senadom Mašovićem i zamjenicima generalmajorima Ivicom Jerkićem i Gojkom Kneževićem. Američku delegaciju predvodila je komandantica Nacionalne garde Maryland generalmajor Janeen Birkhead sa zamjenikom brigadirom Andrewom Collinsom i svojim osobljem te predstavnicima Ureda za odbrambenu saradnju američke ambasade u Bosni i Hercegovini.

Nakon svečane akademije, uslijedila je posjeta delegacije MO i OS BiH i NG Marylanda Vanjskotrgovinskoj komori BiH, Uredu gradonačelnice Sarajeva te Općoj bolnici „Abdulah Nakaš“, radi razmatranja modaliteta civilne saradnje institucija iz BiH i američke savezne države Maryland.

Ministar Helez je podsjetio na značaj koje partnerstvo BiH sa američkom saveznom državom Maryland ima za podizanje operativnih standarda OS BiH. Kroz aktivnosti „Vojska-Vojsci“, zajedničkom obukom i edukacijom, više od 8.000 pripadnika OS i MO BiH je imalo koristi od saradnje sa Marylandom.

Usvajajući znanja i vještine koje im prenose kolege iz SAD, pripadnici OS BiH razvili su svoje sposobnosti, interoperabilnost i kompatibilnost sa NATO snagama.



Susret ministra Heleza i Escobara



Zamjenik predsjedavajuće Vijeća ministara BiH i ministar odbrane BiH Zukan Helez primio je 28. augusta zamjenika pomoćnika državnog sekretara SAD-a za evropske poslove Gabriela Escobara.

Sastanku u Ministarstvu odbrane BiH prisustvovali su i zamjenici ministra odbrane Slaven Galić i Aleksandar Goganović, te ambasador SAD-a u BiH Nj.E. Michael Murphy, sa saradnicima. Ministar Helez se zahvalio gostima na posjeti, uz naglašenu zahvalnost Sjedinjenim Američkim Državama, koje su, kako je rekao, dokazani prijatelj i strateški partner Bosne i Hercegovine.

„Izuzetno cijenimo snažno i kontinuirano prisustvo SAD-a u cijeloj našoj regiji, kao i posvećenost stabilnosti i prosperitetu BiH“, naglasio je ministar Helez. „SAD u velikoj mjeri pomažu jačanje odbrambenih kapaciteta OS BiH. Posebno smo vam zahvalni za pomoć u oblasti obuke naših kadrova, u opremanju novim terenskim vozilima i helikopterima, podršku Bataljonskoj grupi lake pješadije, Deminerskom bataljonu i Centru za obuku za operacije podrške miru“.

Zamjenik ministra Goganović primio državnog sekretara MO Crne Gore



Zamjenik ministra odbrane BiH za upravljanje resursima Aleksandar Goganović primio je u posjetu 23. oktobra državnog sekretara Ministarstva odbrane Crne Gore Krstu Perovića.

Na sastanku se razgovaralo o nastavku odbrambene bilateralne saradnje, sigurnosnoj situaciji u BiH i regionu, te o rješavanju viškova naoružanja, municije i minsko-eksplozivnih sredstava koje naša zemlja ima.

„Crna Gora nam pruža podršku u brojnim segmentima. Naša zemlja je kao i Crna Gora opredijeljena da učestvuje u svim regionalnim inicijativama. Iako je BiH po političkom uređenju komplikovana zemlja, ne trebamo mi biti komplikovani ljudi. Trudimo se ispuniti i zahtjeve koje dobijamo od EU, a što se tiče NATO puta, tu nailazimo na podijeljena mišljenja“, kazao je Goganović. Dodao je da je sigurnosna situacija u BiH stabilna, što je potvrdio i NATO Štab u Sarajevu.

Državni sekretar Ministarstva odbrane Crne Gore Perović kazao je da je važno držati se prijateljskog puta i otvorenih očiju pratiti šta se dešava oko nas.

„Služimo za primjer kako to međusobno sarađuju dvije države. Ostvarujemo stalne kontakte u različitim inicijativama, podržavamo BiH da unaprijedi svoje članstvo u regionalnim inicijativama. Došli smo ovdje da vam izrazimo podršku u svemu što radite“, naglasio je Perović.

Goganović u Kini: Doprinos zajedničkoj sigurnosti i trajnom miru

Zamjenik ministra odbrane BiH za upravljanje resursima Aleksandar Goganović predvodio je delegaciju MO BiH u Narodnoj Republici Kini, na pekinškom forumu „10th Beijing Xiangshan Forum“.



Tema pekinškog foruma bila je zajednička sigurnost i trajni mir. Predstavnici zemalja razgovarali su o odgovornosti velikih zemalja, saradnji i njihovoj ulozi u razvoju globalne sigurnosti.

Tokom obraćanja na panel diskusiji na temu „Humanitarna pomoć i pomoć u slučaju prirodnih nesreća“, zamjenik Goganović je naglasio da Oružane

snage Bosne i Hercegovine imaju dobre kapacitete u pomaganju stanovništvu nakon prirodnih nepogoda i da su pripadnici OS BiH pomagali Turskoj poslije zemljotresa i Sloveniji poslije poplava. Istaknuo je da su ove zemlje pomagale BiH nakon poplava 2014. godine.

Na Forumu su učestvovalе zvanične delegacije iz više od 90 zemalja i međunarodnih organizacija, uključujući i SAD. Sigurnosni forum u Pekingu jedan je od najvećih u svijetu, a broj učesnika dostigao je rekordan nivo, posebno iz zemalja u razvoju, kao i međunarodnih i regionalnih organizacija.



Zamjenik ministra Galić na seminaru Rose-Roth u Švedskoj

Zamjenik ministra odbrane BiH Slaven Galić, na poziv Međunarodnog sekretarijata Parlamentarne skupštine NATO-a, učestvovao je na 104. seminaru „Rose-Roth“ PS NATO-a u švedskom gradu Stockholmu.

Galić je 24. oktobra izlagao na temu „Prevladavanja unutrašnjih i spoljašnjih izazova za napredak prema euroatlantskim integracijama“, pri čemu je govorio o perspektivi BiH u svjetskim okvirima.

U svom izlaganju, Galić je istakao da svijet živi u vremenu višestrukih i višedimenzionalnih izazova, koji su za zemlju poput BiH još složeniji. Govoreći o agresiji na Ukrajinu, zamjenik ministra odbrane BiH je naglasio da za BiH poseban izazov predstavlja što je ona tranzitna zemlja za migrante sa Bliskog istoka i sjeverne Afrike već skoro deceniju.

Galić je zaključio da će Bosna i Hercegovina nastaviti raditi na svojim zadacima kako bi ispunila kriterije za pristupanje EU i potencijalno NATO-u, neprestano radeći na postizanju konsenzusa svih svojih građana o tome.

„Za malu zemlju u centru Evrope nema bolje i razumnije opcije od pridruživanja euroatlantskoj porodici“, naglasio je zamjenik ministra odbrane Galić.

NASTAVAK ŠKOLOVANJA MLADIH PILOTA

Proces stvaranja novih generacija vojnih pilota BiH, selektiranih iz sastava mladih starješina OS BiH, ide dalje.

Predstavnici nadležnih organizacionih jedinica MO i OS BiH predvođeni pomoćnikom ministra za politike i planove Dženanom Redžom, održali su radno-konsultativni sastanak sa predstavnikom ugovarača Škole letenja „Avio Gyro Adriatic SBA“ Harisom Hadžićem o nastavku procesa obuke pripadnika OS BiH, kandidata za dobijanje dozvole za privatnog pilota - PPL (A).

Riječ je o procesu stvaranja novih generacija mladih pilota OS BiH selektiranih iz sastava mladih starješina OS BiH, dok se letačka obuka provodi oslanjanjem na postojeće kapacitete domaćih škola letenja i aeroklubova.

Tokom razgovora izraženo je obostrano zadovoljstvo postignutim rezultatima u prethodnom ciklusu, te su potpisani ugovori o stručnom usavršavanju sa osam kandidata za pilote.



UČEŠĆE PRIPADNICA OS BiH U MIROVNIM MISIJAMA I OPERACIJAMA

U sarajevskom Domu OS BiH, 11. maja je u organizaciji OS BiH održano informiranje pripadnica OS BiH u kategoriji oficira na temu „Učešće pripadnica OS BiH u mirovnim misijama i operacijama“.

Informiranje pripadnica je obavljeno s ciljem praćenja, analize stanja i provođenja aktivnosti iz oblasti rodne ravnopravnosti, sa težištem na realizirane, trenutne i buduće aktivnosti iz domena rodne ravnopravnosti, kao i implementaciju obaveza koje proističu iz Zakona o ravnopravnosti spolova u BiH, Zakona o zabrani diskriminacije u BiH, obaveza iz Partnerskog cilja PG0013 „Žene, mir i sigurnost“ i smjernicama za implementaciju rodnih perspektiva u vojne komponente UN mirovnih operacija.

U drugom dijelu informiranja održan je panel na kojem su razmatrane sljedeće teme:

- Zakoni, propisi i međunarodni akti koji reguliraju upućivanje profesionalnih vojnih lica (PVL) OS BiH u operacije podrške miru (OPM) te primjena i pristup u cilju

upućivanja pripadnica OS BiH u OPM;

- Značaj učešća žena PVL OS BiH u mirovnim misijama i operacijama UN, NATO i EU;
- Uslovi i kriteriji i nominacija za učešće u OPM;
- Iskustva učešća u mirovnim misijama i operacijama.

Na informiranju su pored pripadnica OS BiH prisustvovali parlamentarni vojni povjerenik Boško Šiljegović, generalni inspektor MO BiH brigadni general Mirsad Ahmić, komandantica NATO Štaba Sarajevo brigadni general Pamela McGaha, predstavnica Britanske ambasade u BiH kapetan Jemma Taylor i rodna savjetnica načelnika ZŠ OS BiH major Jasmina Omerbegović.



VODNIK ZIHAD HRELJA SPASIO DJEVOJKU IZ DRINE



Ministar odbrane BiH Zukan Helez upriličio je 21. februara u Domu Oružanih snaga BiH prijem za pripadnike jedinice privremenog sastava OS BiH koji su se vratili iz humanitarne misije u Republici Turskoj, te za pripadnika Deminerskog bataljona OS BiH koji je spasio jedan ljudski život iz rijeke Drine u općini Goražde.

Pripadniku Deminerskog bataljona OS BiH vodniku Zihadu Hrelji, medicinskom tehničaru, koji je 18. februara spasio dvadesetogodišnju djevojku od utapanja iz rijeke Drine, uručena je medalja za hrabrost.

„Prva pomisao mi je bila da spasim ljudski život, bez obzira na posljedice koje su se i meni mogle desiti“, poručio je vodnik Hrelja.

„Primjer je to humanosti, hrabrosti i spremnosti kakvu želimo imati kao primjer svim našim pripadnicima koji su uvijek bili tu na raspolaganju svim našim građanima“, poručio je ministar Helez.

POMOGLI ZAMETENOM TURSKOM DRŽAVLJANINU

Komandant 4. pješadijske brigade, brigadir Zdravko Rezo, je 15. marta na lokaciji kasarne OS BiH „Božan Šimović“ u Čapljini upriličio prijem za pripadnike 3. pješadijskog bataljona 4. pješadijske brigade OS BiH, kaplara Nedima Hubanića i vojnike I klase Enesa Ćurovca, Armina Muslića i Alena Ćeba, koji su 26. februara u večernjim satima pritekli u pomoć turskom državljaninu, koji se zadesio zamećen u snijegu na prevoju Čemerno, između Foče i Gacka.



U trenucima kada je počeo gubiti nadu, u pomoć su pritekli pripadnici 4. pješadijske brigade OS BiH, koji su iz pravca Goražda putovali za Čapljinu, vidjevši automobil zamećen u snijegu sa upaljenim žmigavcima. Vozač, turski državljanin, se nalazio u vozilu u bezizlaznoj situaciji, bez internet-konekcije, bez ikakve pomoći, pošto promet drugih vozila na cesti u datim momentima nije bilo.

Pripadnici 4.pbr su se nesebično stavili u službu pomoći turskom državljaninu, koji je bio vidno zabrinut zbog same situacije u kojoj se iznenadno našao, pokušavajući bezuspješno staviti lance na gume, jer

nisu bili odgovarajući. Pošto su iscrpili sve načine pomoći, odlučili su pozvati šlep-službu iz Goražda. Ostali su uz turskog državljanina oko sat vremena, kako bi bili uz njega dok se nije pojavila šlep služba, kao jedini način pomoći u ovakvoj situaciji.

Turski državljanin je uz pomoć šlep-službe nastavio put prema Trebinju, a pripadnici brigade za Čapljinu, gdje su pohađali Primarni kurs za razvoja vođa. Turski državljanin se zahvalio pripadnicima OS BiH, koji su mu pritekli i obezbijedili pomoć u datom momentu u nadi da se ponovo sretnu i druže u nekoj svjetlijoj strani priče.

Šef savjetodavnog tima EUFOR-a iz sastava OS Turske, kapetan Hayri Semih Borklū, se u svoje ime i ime tima na čijem se čelu odnedavno nalazi puno zahvalio vojnicima 4. pbr istakavši da i pripadnici OS Turske nesebično pružaju pomoć civilnim strukturama, nakon čega im je uručio prigodne poklone kao znak zahvalnosti. Brigadir Zdravko Rezo čestitao je hrabrim momcima na njihovoj humanosti, solidarnosti i profesionalizmu, dajući sve od sebe da bi pružili pomoć drugom u nevolji i istakao kao primjer svim pripadnicima OS BiH, koji su uvijek bili spremni pružiti pomoć našim građanima.

REALIZIRANA 34 PROJEKTA U 25 OPĆINA ŠIROM BiH

Operativna komanda OS BiH je na platou Balkana u općini Mrkonjić Grad, 26. aprila predstavila Godišnju analizu protivminskih akcija OS BiH za 2022. godinu.



Analizi izvedenih protivminskih akcija (PMA) OS BiH za 2022. godinu prisustvovali su zamjenik ministra odbrane za upravljanje resursima Aleksandar Goganović, zamjenik načelnika ZŠ OS BiH za operacije generalmajor Ivica Jerkić, predstavnici Parlamentarne skupštine i Vijeća ministara BiH, vojni i diplomatski predstavnici akreditirani u BiH, predstavnici međunarodne zajednice u BiH, predstavnici deminerskih organizacija u BiH, kao i predstavnici komandi i jedinica OS BiH i civilnih struktura vlasti.

Komandant Operativne komande OS BiH generalmajor Radovan Ilić je istakao da su demineri OS BiH u 2022. godini nastavile sa radom, angažiranjem svojih deminerskih timova na terenu i tom prilikom postigle zapažene rezultate. Posebno je naglasio da su Oružane snage BiH od samog formiranja u kontinuitetu bile angažirane u operacijama humanitarnog deminiranja i predstavljaju najveću deminersku organizaciju u BiH.

Prilikom iznošenja analize izvedenih protivminskih akcija (PMA) OS BiH za

2022. godinu, vršilac dužnosti zamjenika komandanta OK OS BiH za operacije brigadir Mirzet Lubenović, posebnu pažnju je skrenuo na postignute rezultate deminerskih kapaciteta OS BiH u procesu humanitarnog deminiranja. Naglasio je da je planirano Godišnjim planom PMA OS BiH za 2022. godinu, da se izvrši humanitarno deminiranje površine 3,434.665 metara kvadratnih, što se odnosilo na 34 projekta u 25 općina u BiH. Ostvareni rezultati deminerskih kapaciteta OS BiH u 2022. godini su 2,561.113 metara kvadratnih, odnosno 74,57 posto od planiranog.

Pripadnici deminerskog bataljona su prisutnim zvanicama i gostima ovom prilikom prikazali metodsko-pokaznu vježbu medicinske evakuacije zračnim putem u koordinaciji sa pripadnicima 1. helikopterskog skvadrona Brigade zračnih snaga i PVO. Učenicima osnovnih škola iz Mrkonjić Grada prikazana su sredstva i oprema deminera kojima se realiziraju operacije humanitarnog deminiranja.

Načelnik općine Mrkonjić Grad Dragan Vođević zahvalio se pripadnicima OS BiH za ukazano povjerenje za izbor ove općine u cilju realizacije jedne ovako bitne aktivnosti OS BiH.





U cilju pronalaska nestalog bivšeg pripadnika OS BiH Hamida Ferhatovića, 3. i 4. juna 2023. godine angažirano je 36 pripadnika 3. pješadijskog bataljona na zadacima traganja na teritoriji općine Olovo - širi rejon sela Čuništa, u kojem se nalazi kuća nestale osobe.



Pripadnici 2. pješadijskog bataljona 6. pješadijske brigade OS BiH su 6. augusta učestvovali u vježbi Civilne zaštite Grada Cazina „Zemljotres 2023“.



U kasarni OS BiH „Bilečki borci“ u Bileći, 27. aprila izvedena je pokazna vježba „Pomoć civilnim vlastima u gašenju požara“, uz učešće komande 2. pješadijskog bataljona 4. pješadijske brigade, 4. bataljona logističke podrške, 2. helikopterskog skvadrona Brigade ZS i PVO i Profesionalane vatrogasne jedinice iz Bileće.



U cilju podrške međunarodne skijaške trke „Evropa kup superveleslalom za žene – Bjelašnica“, 12. i 13. februara na planini Bjelašnici, helikopter OS BiH bio je u pripravnosti za eventualnu medicinsku evakuaciju povrijeđenih takmičara.



U kasarni OS BiH „Miralem Jugo“ u Livču je 7. marta realizirana pokazna vježba „Pomoć civilnim strukturama u slučaju zemljotresa“. Osim pripadnika Artiljerijskog bataljona u vježbi su učestvovali i pripadnici 4. bataljona logističke podrške OS BiH te pripadnici Vatrogasne jedinice Mostar i Civilne zaštite grada Mostara.



Pripadnici 2. pješadijskog bataljona 6. pješadijske brigade OS BiH i EUFOR-a u BiH, uz podršku pripadnika Brigade zračnih snaga i protivzračne odbrane, Brigade taktičke podrške i Jedinice za podršku MUP USK-a, od 19. do 22. juna realizirali su kombiniranu zajedničku obuku na lokalnom poligonu za obuku u kasarni „Adil Bešić“ u Bihaću. Ministar odbrane Zukan Helez čestitao je svim učesnicima obuke na prezentiranoj vježbi naglasivši da se ovim i sličnim vježbama potvrđuje nivo osposobljenosti pripadnika OS BiH da uspješno izvršavaju zadatke definirane misijom Oružanih snaga BiH.



POKRETAČKA SNAGA U JAČANJU INTEGRITETA

Sedamnaesta konferencija Generalnog inspektorata MO BiH i inspektora komandi i jedinica OS BiH održana je 24. i 27. aprila. Na konferenciji su sumirani rezultati rada sistema inspektora u protekloj 2022. godini.

Prvi dio konferencije održan je u formatu videokonferencije 24. aprila, na kojem su učestvovali generalni inspektor i inspektori Generalnog inspektorata, kao i inspektori komandi i jedinica OS BiH. Težište je bilo na prezentiranju rada inspektora u komandama i jedinicama OS BiH.

Drugi dio konferencije održan 27. aprila u Domu OS BiH u Sarajevu uz 48 gostiju i učesnika konferencije. Pored inspektora iz sastava GI MO BiH, na konferenciji su prisustvovali načelnik Zajedničkog štaba OS BiH Senad Mašović, sekretar MO BiH Muhamed Smajić, predstavnici organizacionih jedinica MO BiH,

komandanti komandi i jedinica OS BiH, predstavnici parlamentarnih tijela i partnerskih agencija sa kojima na izgradnji integriteta sarađuju MO i OS BiH, samostalni izvršilac za pitanja odbrane i civilne komande nad OS BiH iz Predsjedništva BiH, parlamentarni vojni povjerenik BiH, te predstavnici EUFOR-a i NATO Štaba Sarajevo.

Generalni inspektor MO BiH brigadni general Mirsad Ahmić je prezentirao rezultate rada u ovoj oblasti. Rekao je da je od 306 prijava i intervencija više od 95 posto i realizirano. Najveći broj prijava se odnosio na oblast upravljanja personalom i nepoštivanja propisa u

oblasti odbrane. Naveo je i da je više od 50 posto prijava bilo anonimno i upućeno preko sistema „Etička linija“, ali i da je napredak u ovoj oblasti bio evidentan u posljednjih pet godina i primjetan od strane nekih međunarodnih subjekata.

Ocjena svih gostujućih učesnika konferencije je da imaju izuzetnu saradnju sa GI MO BiH i da je upravo GI MO BiH pokretačka snaga u jačanju integriteta, borbe protiv korupcije, izgradnje profesionalizma i promociji etičkih standarda, što značajno doprinosi jačanju odbrambenog sistema.

Konferencija načelnika odbrane zemalja Balkana B-9



U Sofiji je 18. maja održana 16. konferencije načelnika odbrane balkanskih država o vojnoj saradnji (B-9), na kojoj je prisustvovao i načelnik Zajedničkog štaba OS BiH generalpukovnik Senad Mašović.

Konferenciju je otvorio načelnik Generalštaba OS Republike Bugarske admiral Emil Eftimov. Otvaranju foruma prisustvovali su predsjednik i vrhovni komandant Oružanih snaga Republike Bugarske Rumen Radev i ministar odbrane Dimitar Stojanov.

Na konferenciji su učestvovali načelnici odbrane zemalja članica inicijative - Albanije, Bosne i Hercegovine, Grčke, Sjeverne Makedonije, Rumunije, Srbije, Turske i Crne Gore - kao i zemalja posmatrača Slovenije i Hrvatske, predsjedavajući Vojnog komiteta

Evropske unije general Robert Briger i zamjenik komandanta Zajedničke komande NATO snaga u Napulju generalpukovnik Stephen Kelsey.

Tema foruma bila je "Regionalna vojna povezanost i vojna mobilnost kao pokretač partnerstva na Balkanu - traženje inovativnih pristupa produbljivanju saradnje". Forum je pružio priliku načelnicima glavnih štabova da razmotre dodatne načine za poboljšanje vojne mobilnosti u regionu.

Sastanak na nivou načelnika generalštabova EU

Načelnik Zajedničkog štaba OS BiH generalpukovnik Senad Mašović, sa saradnicima, prisustvovao je 11. maja sastanku načelnika generalštabova Evropske unije, u sjedištu Vojnog komiteta EU u Briselu.

Na sastanku se razgovaralo o vođenim misijama EU, između ostalih i o vođenoj misiji EU u Centralnoafričkoj Republici, u kojoj učestvuju i pripadnici OS BiH. Pored toga, razgovarano je i o globalnoj sigurnosnoj situaciji, te je zaključeno da je neophodno daljnje jačanje odbrambenih kapaciteta.

Generalpukovnik Mašović je izrazio

privrženost OS BiH euroatlantskim integracijama, te nadu u nastavak pozitivne saradnje EU sa OS BiH, kako kroz obrazovanje i zajedničku obuku, tako i kroz učešće pripadnika OS BiH u vođenim misijama EU u svijetu, kao i o daljnjoj izgradnji odbrambenih kapaciteta.

Na marginama sastanka, general Mašović se susreo sa vrhovnim komandantom

savezničkih snaga za Evropu generalom Christopherom Cavolijem, a sa načelnicima generalštabova više zemalja je razgovarao o sigurnosnim izazovima sa kojima se suočava svijet, ali i Bosna i Hercegovina. Razgovarano je i o jačanju bilateralne saradnje između oružanih snaga savezničkih zemalja i OS BiH kroz različite vidove kooperacije.



General Jerkić na primopredaji dužnosti komandanta NG Maryland

Na poziv komande Nacionalne garde savezne države Maryland, zamjenik načelnika Zajedničkog štaba OS BiH generalmajor Ivica Jerkić prisustvovao je svečanoj ceremoniji u povodu primopredaje dužnosti komandanta Nacionalne garde savezne države Maryland.

Svečana ceremonija održana je 3. juna u Baltimoru. Uz prisustvo najviših civilnih i vojnih zvaničnika Marylanda te članova porodica, predstavnika partnerskih zemalja i medija generalmajor Timothy E. Gowen predao je dužnost komandanta Nacionalne garde Marylanda generalmajoru Janeen L. Birkhead, koja će novu dužnost obavljati kao 31. komandantica Nacionalne

garde Marylanda. Pored pomenute primopredaje, na novu dužnost su također stupili novi komandanti Kopnenih snaga Nacionalne garde Marylanda brigadir Andrew W. Collins i Zračnih snaga Nacionalne garde Marylanda brigadni general Drew E. Dougherty.

General Jerkić je komandantici Birkhead zaželio uspješan rad na ovoj veoma

odgovornoj poziciji te izrazio nadu za nastavkom i unapređenjem veoma uspješne saradnje između OS BiH i NG Marylanda, koja je ove godine slavila 20. godišnjicu. Također, general Jerkić se zahvalio generalu Gowenu na sveobuhvatnoj i nesebičnoj podršci koju je NG Marylanda pružila OS BiH u proteklom periodu.



Posjeta direktora Međunarodnog vojnog osoblja NATO-a

Načelnik ZŠ OS BiH generalpukovnik Senad Mašović primio je 21. septembra direktora Međunarodnog vojnog osoblja NATO-a generalpukovnika Janusza Adamczaka.

Tokom sastanka, razmijenjene su informacije o trenutnim i budućim aktivnostima i operacijama Oružanih snaga BiH u zemlji i inostranstvu, kao i mišljenja i stavovi u pogledu na trenutne sigurnosne i druge izazove sa kojima se susreće današnji svijet, ali također i Bosna i Hercegovina i njene oružane snage.

Također, razgovarano je o projektima od važnosti za institucije odbrane BiH koji su podržani od strane NATO-a. „NATO ostaje posvećen našem snažnom dijalogu i praktičnoj saradnji sa Bosnom i Hercegovinom“, naglasio je general Adamczak. On je također je istakao opredijeljenost NATO-a za realizaciju paketa pomoći za daljnju izgradnju odbrambenih kapaciteta OS BiH, s ciljem pomoći BiH u implementaciji postojećih planova modernizacije odbrambenih i sigurnosnih struktura.



General Mašović primio komandanta Komande združenih snaga NATO-a

Načelnik ZŠ OS BiH generalpukovnik Senad Mašović 2. juna je primio komandanta Komande združenih snaga NATO-a iz Napulja admirala Stuarda Munscha.

Razgovarano je o implementaciji projekta od važnosti za institucije odbrane BiH, koji su podržani od strane NATO-a. Tom prilikom, admiral Musch je istakao čvrstu opredijeljenost NATO-a za nastavak pružanja podrške aktivnostima institucije odbrane BiH, a posebno kroz implementaciju paketa pomoći Bosni i Hercegovini u sklopu NATO programa Izgradnje odbrambenih i sigurnosnih kapaciteta (DCB).





General Mašović posjetio NG Maryland

Tokom posjete Nacionalnoj gardi Marylanda, delegacija OS BiH se kroz informativne brifinge upoznala sa misijom, zadacima te operativnim sposobnostima glavne združene komande, kopnenih i zračnih snaga Nacionalne garde Marylanda.

Na sastanku se razgovaralo o dodatnom unapređenju trenutne bilateralne i trilateralne vojne saradnje te identifikaciji novih područja vojne saradnje, a koja su od značaja za sve strane. Ovom prilikom general Mašović je trojici podoficira iz sastava NG Marylanda uručio Srebrene plakete MO BiH te se u ime OS BiH zahvalio za njihov nesebičan doprinos koji su dali u razvoju veoma uspješne vojne saradnje, koja između Bosne i Hercegovine i savezne američke države Maryland traje već punih 20 godina.

Generalpukovnik Senad Mašović je 19. jula godine predvodio delegaciju OS BiH koja je posjetila Nacionalnu gardu američke savezne države Maryland.

Posjeta benda i hora Vojske SAD za Evropu i Afriku

U Tuzli i Brčkom su 8. i 9. maja održani zajednički koncerti Vojnog orkestra OS BiH i Vojnog orkestra Vojske SAD za Evropu i Afriku.

Pod dirigentskom palicom poručnika Borisa Bomoštara, uz pomoć starijeg vodnika I klase Nikka Lomonofa, orkestri su vrijedno vježbali i pripremili program „svjetskog“ kalibra.

Bila je ovo prilika da građani Tuzle i Brčkog uživaju u muzičkom događaju, kao i muzičkim izvedbama najpoznatijih evergrina, pop i rock pjesama. Ovo je još jedan u nizu događaja kojim se afirmira

bilateralna saradnja Bosne i Hercegovine i Sjedinjenih Američkih Država, kroz saradnju vojnih orkestara dviju država.

Vojni bend i hor američke Vojske za Evropu i Afriku stacioniran je u Njemačkoj te su muzički ambasadori Oružanih snaga SAD u Evropi. Održavaju više od 200 nastupa i koncerata svake godine u više od 20 evropskih zemalja i zemalja Srednjeg istoka. Po brojnosti, vojni bend i hor američke vojske je treća najveća muzička organizacija u Oružanim snagama SAD, a najveća izvan Evrope.



Inspekcijski letovi Otvorenog neba

Ugovor „Otvoreno nebo“ predstavlja jedan od sigurnosnih aranžmana koji zemljama potpisnicama omogućuje snimanje teritorije zemlje iznad koje se obavlja posmatrački let, kao mjera izgradnje međusobnog povjerenja.

U periodu od 15. do 19. maja, iznad BiH je realiziran drugi ovogodišnji Posmatrački let u režimu Otvorenog neba, od strane zemalja Beneluksa (Nizozemska, Belgija i Luksemburg), Kraljevine Španije, Portugala i Rumunije.

Posmatrački let je ostvaren 17. maja avionom Antonov An-30 iz sastava rumunskog ratnog zrakoplovstva, a završni sastanak i



potpisivanje Formata OSF-14 uspješno je realizirano sutradan.

Naredni posmatrački let u okviru Ugovora „Otvoreno nebo“ obavljen je 6. septembra uz učešće inspektora za kontrolu naoružanja iz sastava oružanih snaga Ujedinjenog Kraljevstva, Kanade, Češke, Švedske i Bosne i Hercegovine.

MO i OS BiH su u saradnji sa Ministarstvom vanjskih poslova BiH, Ministarstvom komunikacija i transporta BiH i Međunarodnim aerodromom Sarajevo realizirali ovaj let posmatračkim avionom iz sastava Ministarstva odbrane, odnosno Oružanih snaga Savezne Republike Njemačke. Radi se o putničkom avionu Airbus A319CJ posebno opremljenom senzorima i kamerama za snimanje teritorija po Ugovoru „Otvoreno nebo“.

Promocija knjige „Hemija baruta i pogonskih goriva“

Knjiga „Hemija baruta i pogonskih goriva“, autorsko djelo kapetana Namira Halilovića, načelnika Laboratorije za ispitivanje hemijske stabilnosti pogonskih goriva municije, Glavne logističke baze Komande logistike OS BiH, predstavljena je 15. juna u Domu OS BiH u Sarajevu.

Knjiga je nastala iz potrebe obnavljanja i proširenja stručne literature na polju pogonskih goriva municije, te je po sadržaju usko vezana za municiju, odnosno vojnu i namjensku industriju, pri čemu je pisana tekstom razumljivim širokom spektru korisnika.

Knjiga, osim pregleda stručnih i naučnih aspekata spomenute teme, nudi i mogućnost konkretne i praktične primjene najnovijih saznanja i postignuća u ovoj oblasti. Radi se o publikaciji čija je korisnost i upotrebnost vrijednost već testirana na način da su sa njenim sadržajem upoznati predstavnici vojne industrije, zainteresirani za različite vrste pogonskih goriva, počevši od čvrstih i tečnih do hibridnih.

UČEŠĆE U OPERACIJAMA PODRŠKE MIRU

Pripadnici OS BiH su trenutno angažirani u dvije operacije podrške miru, i to: MONUSCO u Demokratskoj Republici Kongo i u misiji obuke Evropske unije u Centralnoafričkoj Republici EUTM CAR.

MONUSCO

Dvadeseta rotacija je upućena na izvršenje ove UN-ove misije 26. na 27. marta. Trenutno su u misiji raspoređena dva pripadnika OS BiH. MO BiH je pokrenulo pripreme radnje za upućivanje 21. rotacije u misiju. Njihovo raspoređivanje u misiju je planirano za mart 2024. godine.

Mandat jedne rotacije traje godinu dana. Ukupno je do sada 79 pripadnika Oružanih snaga Bosne i Hercegovine angažirano u ovoj misiji.

EUTM CAR

Tri pripadnika 11. rotacije OS BiH su upućena u ovu UN-ovu misiju u februaru 2022. godine, a nastavak angažiranja potvrđen je upućivanjem tri pripadnika 12. rotacije tokom augusta 2023. godine. Ukupno su do sada 33 pripadnika Oružanih snaga Bosne i Hercegovine angažirana u misiji.

Čeka se odobrenje za Irak

Pored navedenih misija, MO BiH je pokrenulo proceduru za potencijalni doprinos OS BiH u NATO-ovu misiju u Iraku (NATO Mission Iraq - NMI) kroz učešće u zajedničkom projektu u okviru Regionalne inicijative US Adriatic Charter. MO BiH je u skladu sa predviđenim procedurama uputilo Informaciju prema Predsjedništvu BiH u vezi sa potencijalnim učešćem Oružanih snaga BiH u NATO misiji u Iraku. Po dobijanju odobrenja od strane Predsjedništva BiH, MO BiH će poduzeti daljnje korake ka upućivanju pripadnika OS Bosne i Hercegovine.

PETO SPORTSKO PRVENSTVO OS BiH

Svečano otvaranje Petog sportskog prvenstva Oružanih snaga BiH realizirano je 25. aprila u hotelu Hills - Ilidža.

Prvenstvo se održavalo do 3. novembra na lokacijama kasarni OS BiH i dvoranama pod zakupom u disciplinama: futsal, odbojka, streljaštvo, atletika, orijentacijsko trčanje i košarka. Organizator sportskog prvenstva bila je Operativna komanda OS BiH, a nosilac realizacije prvenstva 6. pješadijska brigada OS BiH.

Nakon otvaranja prvenstva u dvorani hotela Hills 25. aprila, izvršeno je takmičenje u futsalu (muškarci), sa sedam ekipa uz oko 70 učesnika iz sastava jedinica OS BiH. U istom vremenskom periodu na lokaciji kasarne „Božan Šimović“ održalo se takmičenje u futsalu (žene), a učestvovala su tri ekipe sa oko 30 učesnika iz sastava jedinica OS BiH.

Rezultati nakon završetka takmičenja u disciplini FUTSAL (muškarci) su sljedeći:

Prvo mjesto osvojila je ekipa Komande logistike OS BiH, drugo mjesto osvojila je

ekipa 6. pješadijske brigade, treće mjesto osvojila je ekipa 5. pješadijske brigade. Za najboljeg igrača ovogodišnjeg takmičenja proglašen je vojnik I klase Elmin Turić iz sastava ekipe Komande logistike.

Titulu najboljeg strijelca ovogodišnjeg takmičenja OS BiH u disciplini „FUTSAL“ – muškarci, osvojio je vojnik I klase Mersad Softić iz sastava ekipe 6. pješadijske brigade.

Za najboljeg golmana ovogodišnjeg takmičenja OS BiH u disciplini „FUTSAL“ – muškarci, proglašen je potporučnik Sinan Habibović iz sastava ekipe 6. pješadijske brigade.

Rezultati nakon završetka takmičenja u disciplini FUTSAL (žene) su sljedeći:

Prvo mjesto osvojila je ekipa 5. pješadijske brigade, drugo mjesto ekipa 4. pješadijske brigade, treće mjesto osvojila je ekipa 5. pješadijske brigade.

Za najboljeg igrača ovogodišnjeg takmičenja OS BiH u disciplini „FUTSAL“ – žene, proglašena je vojnik I klase Ulmija Čančar iz sastava ekipe 5. pješadijske brigade.

Titulu najboljeg strijelca ovogodišnjeg takmičenja OS BiH u disciplini „FUTSAL“ – žene, ostvarila je vodnik Ivana Cvitković iz sastava ekipe 5. pješadijske brigade.

Za najboljeg golmana ovogodišnjeg takmičenja OS BiH u disciplini „FUTSAL“ – žene, proglašena je vojnik Josipa Šimunović iz sastava ekipe 4. pješadijske brigade.

Realizacijom sportskog prvenstva, Oružane snage BiH imaju priliku sagledati ukupni sportski potencijal, koji će dostojno predstavljati OS BiH na međunarodnim sportskim takmičenjima u organizaciji Međunarodnog sportskog vojnog vijeća (CISM).



BALKAN GAMES

Half Marathon

Oružane snage BiH su u koordinaciji sa udruženjem „Dečki u plavom“ uspješno realizirali međunarodnu sportsku manifestaciju u Atletici 7. maja na ulicama Sarajeva.

Na sarajevskom polumaratonu učestvovali su atletičari iz sastava oružanih snaga Grčke, Turske, Rumunije, Slovenije, Srbije, Crne Gore, Makedonije, Nizozemske i Bosne i Hercegovine. Na navedenom događaju ispred OS BiH učestvovalo je 10 pripadnika OS BiH, šest muškarca i četiri žene u disciplini polumaraton 21 kilometar.



„Ovo je prilika da se podsjetimo na značaj sporta u oružanim snagama. Sport je oduvijek igrao veoma važnu ulogu u životima naših pripadnika, i ne samo da im pomaže u održavanju fizičke forme, već pomaže i u izgradnji prijateljstva i timskog rada, što je ključno za uspjeh svake misije“, istakao je general Ahmić.



U svom obraćanju na ceremoniji otvaranja, generalni inspektor Ministarstva odbrane BiH brigadni general Mirsad Ahmić je podsjetio na značaj koju međunarodna organizacija CISM ima u jačanju mira i prijateljstva među pripadnicima oružanih snaga raznih zemalja, te istakao zadovoljstvo što su Ministarstvo odbrane i Oružane snage BiH domaćin ovog važnog događaja.



Prvo mjesto - Murat Emektar, Turska, vrijeme 1:05:47; drugo mjesto - Huseyin Can, Turska, vrijeme, 1:06:36; treće mjesto - Ioannis Zeevakis, Grčka, 1:09:07.



Konačni poredak po vremenu za prva tri mjesta (žene), na sportskoj manifestaciji „Balkan Games – Half Marathon“, Sarajevo 2023:

Prvo mjesto - Jasmina Pitamič, Slovenija, vrijeme 1:22:42; drugo mjesto - Nataša Čulafić, Srbija, vrijeme 1:28:15; treće mjesto - Ionela Puia, Rumunija, vrijeme 1:28:38.



Pripadnica OS BiH Katarina Vištica prvakinja u kik-boksu

Boklerski spektakl "The Road to the Stars", na kojem je upriličena borba za evropsku i svjetsku titulu, održan je 23. aprila u gradskoj sportskoj dvorani u Ljubuškom.



Na rasporedu je bilo više borbi, a u glavnoj borbi večeri u Superwelter kategoriji do 72.5 kilograma, vojnik I klase Katarina Vištica, pripadnica 4. pješadijske brigade Oružanih snaga Bosne i Hercegovine borila se protiv Sonje Pilipović iz Hamburga, te osvojila dvije titule prvaka. Prva je u Evropskoj federaciji, a druga je u WBFF (World Boxing Federation) kategoriji. Ovo je bila prva borba tog tipa ne samo u Ljubuškom, već i u cijeloj regiji.

PRIJATELJSKA UTAKMICA ŽENSKIH FUDBALSKIH REPREZENTACIJA

OS BiH : OS Ujedinjenog Kraljevstva 6:0

Uspješna dugogodišnja bilateralna saradnja između Bosne i Hercegovine i Ujedinjenog Kraljevstva Velike Britanije i Sjeverne Irske nastavlja se u svim oblastima pa tako i oblasti sporta, gdje je u kasarni OS BiH „Travnik“ u Travniku 7. juna odigrana prijateljska utakmica ženskih fudbalskih reprezentacija Oružanih snaga Bosne i Hercegovine i armijske reprezentacije Ujedinjenog Kraljevstva.

Na početku aktivnosti kao domaćin na lokaciji kasarne „Travnik“ u ime komandanta Komande za obuku i doktrinu obratio se pukovnik Slobodan Simić, koji je pozdravio učesnike ovog događaja, te naglasio značaj utakmice sa aspekta razvoja sporta kao i saradnje OS BiH sa UK.

Reprezentacija Bosne i Hercegovine slavila je sa rezultatom 6:0.

Fudbalska utakmica je pored druženja imala za cilj jačanje svijesti o ulozi žena u vojsci i sportu, rušenju barijera, razbijanju stereotipa kao i mogućnošću koje nudi vojni poziv. Obje ekipe su prije utakmice u Travniku održale zajednički trening sa djecom iz Akademije Fudbalskog kluba Travnik. Na kraju utakmice razmijenjeni su prigodni pokloni, a aktivnost je nastavljena uz druženje fudbalskih ekipa u kasarni „Travnik“ OS Bosne i Hercegovine.



SARADNJA SA OLIMPIJSKIM KOMITETOM BiH

Ministarstvo odbrane BiH otpočelo je 10. oktobra sa Olimpijskim komitetom BiH službene razgovore o postizanju sporazuma po kojem bi vrhunski sportisti iz naše zemlje mogli postati pripadnici OS BiH, čime bi stekli bolje materijalne mogućnosti i uslove treninga za lakši nastavak svoje profesionalne sportske karijere u redovnim takmičenjima.

Budući da su Oružane snage BiH od 2007. godine članica Međunarodnog vojnog sportskog komiteta (CISM), u čijim aktivnostima učestvuju 133 zemlje u tridesetak sportova, vrhunski sportisti iz naše zemlje, koji bi postali i pripadnici OS BiH, osim u redovnim sportskim takmičenjima van oružanih snaga, nadmetali bi se i u sportskim aktivnostima u organizaciji CISM-a.

Inicijalni razgovor o postizanju adekvatnog sporazuma upriličili su pomoćnik ministra odbrane BiH za politiku i planove Dženan

Redžo i generalni sekretar OK BiH Said Fazlagić sa saradnicima.

Inicijalni sastanak se temeljio na mogućnostima ostavarivanja bliže saradnje između OK BiH, MO i OS BiH te pružanja što boljih mogućnosti bavljenja sportom za pripadnike OS BiH, razvoja sporta u OS BiH, promocije vrhunskih sportista i sportskih rezultata ostvarenih na domaćim i međunarodnim događajima i slično. Potpisivanje sporazuma očekuje se uskoro.



34. MEĐUNARODNA KONFERENCIJA VJERSKIH SLUŽBI U VOJSCI

Pod pokroviteljstvom Komande Oružanih snaga SAD u Evropi (EUCOM), od 6. do 10. februara u Bukureštu u Rumuniji, organizirana je 34. međunarodna konferencija rukovodilaca vjerske službe u vojsci.

Tema konferencije bila je „Ljudska i misijska uloga vojnih kapelana u trenutnim geopolitičkim i vjerskim kontekstima“. Predstavnicima Vjerske službe Ministarstva odbrane BiH poziv na konferenciju uputio je glavni kapelan EUCOM-a brigadir Christopher Lapack. U cilju adekvatnog unapređenja vrijednosti države, njenih institucija, kao i vjerskih zajednica, bosanskohercegovačku delegaciju na ovom skupu predstavljali

su vojni muftija Hadis-ef. Pašalić, protojerej Milorad Milinković i don Josip Tadić.

Konferenciju je otvorio načelnik Zajedničkog štaba Oružanih snaga Rumunije, te episkop i biskup iz Bukurešta. Na početku konferencije svi prisutni su molitvom odali počast stradalima u zemljotresu u Turskoj i Siriji.




Delegacija MO i OS BiH u posjeti episkopu bihaćko-petrovačkom, ujedno i vojnom episkopu Sergiju



Zamjenik ministra odbrane BiH Aleksandar Goganović, zajedno sa zamjenikom načelnika ZŠ OS BiH generalmajorom Gojkom Kneževićem i nastojateljem Kancelarije pravoslavnog dušebrižništva protojerejem Miloradom Milinkovićem boravili su u radnoj posjeti episkopu bihaćko-petrovačkom i vojnom episkopu Sergiju u manastiru Rmnju, 3. aprila.

Ovom prilikom zamjenik ministra odbrane Aleksandar Goganović uručio je episkopu Sergiju skromnu novčanu pomoć za obnovu manastira Rmnja, a u čijoj akciji prikupljanja su učestvovali svi pravoslavni vjernici, pripadnici MO i OS Bosne i Hercegovine.

Vojni episkop Sergije se zahvalio na posjeti i podršci svima koji su učestvovali u ovoj akciji, nakon čega je prisutne upoznao sa građevinskim radovima u manastiru Rmanj.



Slava crkve Svetih mučenika jasenovačkih u kasarni „Kozara“ u Banjoj Luci

Pripadnici OS BiH iz reda srpskoga naroda, vezanih službom za banjalučki garnizon, i ove godine su 13. septembra proslavili hramovnu slavu Vojne crkve u kasarni OS BiH „Kozara“ u Banjoj Luci - posvećenu Svetim mučenicima Jasenovačkim.

Praznik je proslavljen služenjem Svete liturgije, slavskim obredom i trpezom ljubavi za sve vojnike, zvanice i goste u kasarni Kozara. Svetu liturgiju služili su protojerej Ivan Savinović, protonamjesnik

Goran Sibinčić, protonamjesnik Dragan Grujić, jerej Nemanja Lakić i jerej Boris Stanić. Besjedu u povodu praznika i hramovne slave održao je protonamjesnik Dragan Šućur.

U svečanoj sali 3. pješadijskog (Republika Srpska) puka OS BiH, obavljen je slavski obred i obraćanje zvanica, među kojima se kao domaćin slave i lokacije obratio brigadir Radovan Jović.

Pravoslavni Božić u kasarni „Kozara“ u Banjoj Luci

Tradicionalni prijem u povodu praznika Rođenja Gospoda Isusa Hrista – Božića, upriličen je 11. januara kasarni OS BiH „Kozara“ u Banjoj Luci.



Svečanost obilježavanja Božića započela je Svetom arhijerejskom liturgijom, koju je u kapeli Svetih novomučenika jasenovačkih služio Njegovo preosveštenstvo episkop bihaćko-petrovački i ujedno vojni episkop gospodin Sergije, uz sasluženje vojnih sveštenika iz MO i OS BiH.

Svečanosti su, između ostalih, prisustvovali član Predsjedništva BiH Željka Cvijanović, generali Oružanih snaga BiH, predstavnici Ministarstva odbrane BiH i komandi i jedinica OS BiH, delegati u Parlamentarnoj skupštini BiH, predsjednik Republike Srpske Milorad Dodik, ministri u Vladi Republike Srpske, penzionisani generali Vojske Republike Srpske te predstavnici vojno-diplomatskog kora u BiH i pukovnik Miroslav Baljak, načelnik Centra javne bezbjednosti Zvornik. Nakon liturgijskog sabranja, upriličena je trpeza ljubavi za sve prisutne.

Krsna slava hrama Svetog velikomučenika Prokopija u kasarni „Dubrave“ u Tuzli

Pravoslavni vojnici koji službuju u kasarni OS BiH „Dubrave“ su 21. jula proslavili krsnu slavu hrama i svoga zaštitnika, Svetog velikomučenika Prokopija.

Svetu liturgiju služili su vojni sveštenici Ministarstva odbrane i Oružanih snaga Bosne i Hercegovine i sveštenstvo Eparhije zvrničko-tuzlanske.

Nakon lomljenja slavskog kolača, upriličena je trpeza ljubavi u vojnom restoranu, gdje se prisutnim obratio protojerej

Milorad Milinković, nastojatelj Kancelarije pravoslavnog dušebrižništva, koji je tom prilikom čestitao krsnu slavu i zahvalio se brigadnom svešteniku protojereju Ivanu Savinoviću, na njegovom dugogodišnjem zalaganju i predanom radu na unapređenju vjerske službe u MO i OS BiH.

Obilježavanju slave prisustvovali su i komandant 3. pješadijskog bataljona u Bijeljini pukovnik Miroslav Baljak, načelnik Centra javne bezbjednosti Zvornik Aleksandar Vasiljević i pravoslavni pripadnici Oružanih snaga Sjeverne Makedonije.



Krsna slava vojnih sveštenika

Njegovo preosveštenstvo episkop bimačko-petrovački Sergije, vojni episkop pri MO i OS BiH, služio je Svetu arhijerejsku liturgiju 12. novembra 2023. godine, u hramu prenosa moštiju Svetog Nikolaja Mirlikijskog Čudotvorca, povodom krsne slave vojnih sveštenika, Svetog Varnave Hvostanskog Ispovjednika.

Episkopu Sergiju sasluživali su protojerej Milorad Milinković, protonamjesnik Duško Lalović, jerej Miroslav Todorović, jerej Boris Stanić i protođakon Nemanja Reljić.

Poslije pročitanoj je jevanđelskog začala, episkop Sergije se obratio prisutnom sveštenstvu, hristoljubivoj vojsci i blagovjernom narodu liturgijskom besjedom.

Ovom prilikom, na blagoslov vojnom sveštenstvu, episkop Sergije je darovao mošti Svetog Varnave Hvostanskog Ispovjednika.



Goganović na obilježavanju krsne slave kasarne „Vojvoda Radomir Putnik“ u Doboju



Zamjenik ministra odbrane Aleksandar Goganović zajedno sa pravoslavnim pripadnicima Oružanih snaga BiH sa lokacije u Doboju obilježili su 8. novembra krsnu slavu kasarne „Vojvoda Radomir Putnik“ u Doboju, praznik Svetog Dimitrija Mirotočivog.

Nakon liturgije u Hramu Rođenja Presvete Bogorodice, obavljeno je osvećenje svete vodice, potom je formirana litija i obavljeno osvećenje slavskog kolača i žita, poslije čega je poslužen slavski ručak.

Krsnoj slavi prisustvovali su pravoslavni pripadnici jedinica OS BiH, sveštenstvo Dobojske parohije, glavni sveštenik OS BiH, pomoćnici ministra odbrane Mišo Božićković i Predrag Đurić, komandant 6.pbr brigadir Radovan Jović, predstavnici Policijske uprave Doboju, kao i penzionisani pripadnici OS BiH pravoslavne vjeroispovijesti.

Posjeta imamskoj službi MO Kraljevine Saudijske Arabije



U periodu od 31. marta do 4. aprila, delegacija Vojnog muftijstva predvođena vojnim muftijom Hadisom ef. Pašalićem učestvovala je na skupu predstavnika imamske službe u vojsci iz zemalja koje imaju oraganiziranu ovu vrstu službe u svojim oružanim snagama.

Delegacija Vojnog muftijstva je bila učesnik ovog programa na poziv Ministarstva odbrane Kraljevine Saudijske Arabije, a pored vojnog muftije u delegaciji su bili i glavni imam Oružanih snaga BiH, Nesib ef. Hadžić i savjetnik vojnog muftije Muhamed Okić.

Učešće predstavnika Vojnog muftijstva u ovom programu bila je prilika da se predstavi model organizacije vjerske službe u MO i OS BiH, čiji je sastavni dio i Vojno muftijstvo, te da se razmijene iskustva i metode rada na polju duhovne skrbi za muslimane, pripadnike oružanih snaga zemalja učesnica na ovom skupu.

Vojni muftija Hadis ef. Pašalić i delegacija MO i OS BiH su se u okviru programa koji je za ovu priliku pripremljen, sastali

i sa direktorom Generalne uprave za vjerska pitanja Oružanih snaga Kraljevine Saudijske Arabije, Abdurrahmanom b. Abdulazizom Al-Hisejnjem. Dogovoren

je nastavak i intenziviranje saradnje, kroz različita polja organiziranja značajna za kvalitetnije načine realizacije vjerskog života muslimana u oružanim snagama.



Posjeta vojnih imama NATO-a i promocija Zbornika radova "Muslimani u službi mira"

Ministar odbrane BiH Zukan Helez razgovarao je 25. septembra sa predstavnicima imamske službe u oružanim snagama NATO zemalja, koju su činili vojni imami iz Nizozemske, Ujedinjenog Kraljevstva i Kraljevine Norveške.

Sastanku su prisustvovali i predstavnici Ureda vojnog muftije, na čelu sa vojnim muftijom Hadisom ef. Pašalićem, a ministar Helez je naglasio značaj duhovne skrbi u vojnom okruženju, kao i važnost razmjene iskustava po pitanju upražnjavanja vjerskih prava i sloboda u oružanim snagama zemlja članica NATO-a i OS BiH.

Gosti su iskazali zadovoljstvo prilikom da borave u MO BiH i da ostvaruju saradnju i razmjenjuju dragocjena iskustva sa Uredom vojnog muftije u MO BiH. Naglasili su značaj zajedničkih projekata sa predstavnicima Vjerske službe MO i OS BiH i izrazili nadu i očekivanja da će se ova saradnja nastaviti i u budućnosti na obostranu korist i

zadovoljstvo. Predstavljajući gostujuću delegaciju, vojni muftija je govorio o izuzetnoj saradnji sa vojnim imamima iz prijateljskih i partnerskih zemalja, te naglasio važnost projekta održavanja Međunarodne konferencije vojnih imama svake druge godine.

Muftija Pašalić je posebno istakao završetak projekta pripreme i izdavanja Zbornika radova pod naslovom „Muslimani u službi mira – Muslimanske službe u oružanim snagama zapadnih zemalja“, koji je svojevrsna hrestomatija propisa i procedura o načinima organiziranja i realizacije vjerskih aktivnosti u oružanim snagama zapadnih zemalja koje imaju

uspostavljenu imamsku službu. Predmetni Zbornik radova je ujedno i priručnik o načinima realizacije duhovne skrbi i vjerskih aktivnosti u komandama i jedinicama savremenih vojski, sa posebnim naglaskom na duhovnu službu muslimana, a na pripremi ovog značajnog štiva radilo je 10 autora iz različitih zemalja, uključujući i MO i OS BiH.

Promotori Zbornika radova su, istog dana u Domu OS BiH, pored muftije Hadisa ef. Pašalića, bili Ali Eddaoudi, brigadir i glavni imam u vojsci Nizozemske, Najeeb ur Rehman Naz, major i imam u vojsci Norveške i Hafiz Asim, savjetnik u Ministarstvu odbrane Velike Britanije.

Vojno muftijstvo posjetilo pripadnike OS BiH u Zagrebu

Prema planu međunarodne saradnje Ministarstva odbrane Bosne i Hercegovine i Ministarstva odbrane Republike Hrvatske, od 24. do 26. oktobra upriličena je posjeta delegacije Vojnog muftijstva pripadnicima Oružanih snaga BiH na Hrvatskom vojnom učilištu u Zagrebu.

Delegaciju Vojnog muftijstva predvodio je vojni muftija Hadis-ef. Pašalić, a u njegovoj pratnji bili su glavni imam Oružanih snaga Nesib-ef. Hadžić i stručni savjetnik Muhamed-ef. Okić. Na sastanku sa oficirima i kadetima OS BiH, vojni muftija je izrazio zadovoljstvo upriličenom posjetom i čestitao im na dosadašnjim uspjesima u njihovom školovanju. Oficiri i kadeti zahvalili su vojnom muftiji na posjeti i brizi o njihovim vjerskim pravima, za koja su kazali da se na ovoj akademiji poštuju i uvažavaju.

Zajedno sa generalnim sekretarom Mešihata Islamske zajednice u Hrvatskoj Nerminom Botonjićem, koji inače u ime Mešihata brine o organizaciji vjerskog života za muslimane u Oružanim snagama RH, dogovorena je još kvalitetnija saradnja u pružanju vjerske podrške za muslimane pripadnike Oružanih snaga BiH.

Tokom posjete, upriličen je sastanak i sa zapovjednikom Hrvatskog vojnog učilišta „Dr. Franjo Tuđman“, generalmajorom Slavenom Zdilarom i njegovim prvim saradnicima. Uz iskazanu zahvalnost za brigu o vjerskim pravima muslimana na

ovoj akademiji, vojni muftija je dao nekoliko prijedloga za određene kurseve koje bi pohađali vjerski službenici u vojsci.

U cilju razvijanja međureligijskog dijaloga i unapređenja saradnje vjerskih službi MO BiH i MO RH, delegacija je posjetila vojnog biskupa Juru Bogdana i njegove saradnike u Vojnom ordinarijatu. U razgovoru su razmijenjena korisna iskustva o izazovima sa kojima se susreću vjernici i vjerski službenici u vojsci.

Posjetom sjedištu Mešihata Islamske zajednice u Hrvatskoj, učenjem Fatihe poginulim Bošnjacima u sastavu Hrvatske vojske u Domovinskom ratu, i sastankom sa potpredsjednikom Sabora Islamske zajednice u RH Mirzom Šabićem, generalnim sekretarom Mešihata mr. Nerminom Botonjićem i glavnim imamom Medžlisa Islamske zajednice u Zagrebu hfz. Azizom Alilijem, upotpunjena je službena posjeta. U povratku za BiH, članovi delegacije posjetili su Islamski centar u Sisku.



Ramazanski iftar u kasarni „Kozara“ u Banjoj Luci

Tradicionalni Ramazanski iftar, u organizaciji Komande za podršku OS BiH, organiziran je 11. aprila u kasarni OS BiH „Kozara“ u Banjoj Luci.

Radost zajedničkog iftara sa pripadnicima MO i OS BiH podijelili su brojni gosti i zvanice iz vjerskog, političkog i javnog života, između ostalih načelnik ZŠ OS BiH generalpukovnik Senad Mašović, generalni inspektor MO BiH brigadni general Mirsad Ahmić, vojni muftija Hadis-ef. Pašalić, ministar za ljudska prava i izbjeglice BiH Sevlid Hurtić, zamjenik predsjedavajućeg Doma naroda BiH Kemal Ademović, potpredsjednik Republike Srpske Čamil Duraković, zamjenik predsjedavajućeg Vijeća naroda Narodne skupštine RS Mirsad Duratović, kao i predstavnici Pravoslavne i Katoličke crkve, raznih organizacija, udruženja i agencija sa područja Banje Luke, te građani.

Nakon što je Edhem ef. Čamdžić (muftija banjalučki 1999-2014),

proučio iftarsku dovu, dobrodošlicu prisutnim gostima zaželio je štabni imam mr. Salih ef. Grabus. Potom se prisutnim gostima obratio domaćin iftara brigadir dr. Rusmir Mrković, zamjenik komandanta KP OS BiH za resurse. Uz dobrodošlicu i zahvalnost gostima što su svojim prisustvom uveličali ovo druženje, brigadir Mrković je rekao: „Vjernici islamske vjeroispovijesti se posebno raduju mjesecu Ramazanu, a svoju radost kao i do sada dijelimo sa svojim sugrađanima, prijateljima i radnim kolegama. Čast mi je što smo okupili ljude različitih profesija, vjeroispovijesti i opredjeljenja da zajedno podijelimo radost Ramazana. Ovakav vid okupljanja predstavlja najveći simbol suživota, njegujući tradicionalne vrijednosti koje nas čine posebnim i jedinstvenim u svijetu. Mi, pripadnici OS BiH, ovaj današnji zajednički iftar doživljavamo kao dio naše misije, koji izvršavamo sa posebnim zadovoljstvom“, naglasio je brigadir dr. Rusmir Mrković.

Iftarsku poruku je uputio i vojni muftija Hadis-ef. Pašalić, u kojoj je posebno istakao da je mjesec Ramazana, mjesec dobrote, pomoći siromašnim i bolesnim, navodeći da je to najveća nagrada za jednog postača. Prenio je pozdrave reis-ul-uleme BiH Huseina ef. Kavazovića te izrazio zadovoljstvo što je bio u prilici da radost iftara podijeli sa pripadnicima OS BiH u Banjoj Luci.



Na katoličkom hodočašću u francuskom Lurdu

Međunarodno vojno hodočašće u Lurdu simbolizira susret zaraćenih strana u Drugom svjetskom ratu, u ovom francuskom gradiću, gdje se, prema predanju, 1858. godine djevojčici Bernardici Soubirous ukazala Djevica Marija.

Predvođeni vrhbosanskim nadbiskupom i apostolskim upraviteljem Vojnog ordinarijata u BiH mons. Tomom Vukšićem, pripadnici OS i MO BiH katoličke vjeroispovijesti od 8. do 16. maja hodočastili su na 63. međunarodnom vojnom hodočašću u francuskom mjestu Lurdu, na kojem su učestvovali vojnici i policajci iz više od 30 zemalja svijeta.

Na čelu delegacije MO i OS BiH bili su zamjenik ministra odbrane BiH Slaven Galić i zamjenik načelnika ZŠ OS BiH generalmajor Ivica Jerkić. Pripadnici MO i OS BiH hodočašće su započeli misnim slavljem na Plehanu u BiH 8. maja u Crkvi svetog Marka. Dan kasnije sastali su se sa hodočasnicima iz sastava Oružanih snaga Republike Hrvatske u Avinjonu, te imali zajedničku svetu misu.

U Lurdu, 11. maja, pred Pećinom ukazanja, nakon zajedničke svete mise na hrvatskom jeziku, uslijedila je vojna procesija i križni put.



Po 20. put na Bobovcu molili za sve ljude u BiH

Katolici OS BiH i policajci iz više kantona i nivoa vlasti naše zemlje, 21. oktobra na Bobovcu su po 20 put učestvovali u hodočašću „Molitva za Domovinu“.

Euharistijsko slavlje na Bobovcu, koji se nalazi na području župe Kraljeva Sutjeska, predvodio je nadbiskup metropolit vrhbosanski i apostolski upravitelj Vojnog ordinarijata u BiH mons. Tomo Vukšić, uz koncelebraciju generalnog vikara Vojnog ordinarijata u Republici Hrvatskoj don

Marka Mede i vojnog vikara Slovenske vojske patera Mateja Jakopiča. Svetoj misi na nekadašnjem sjedištu srednjovjekovnih bosanskih vladara, a uz dan smrti bosanske kraljice Katarine Kosače-Kotromanić, prisustvovali su zamjenik ministra odbrane BiH za politiku i planove Slaven Galić i

zamjenik načelnika Zajedničkog štaba OS BiH za operacije generalmajor Ivica Jerkić

U hodočašću su učestvovali i vjernici iz okolnih i udaljenih župa, uz prisutnost prvog zamjenika predsjedavajućeg Doma naroda BiH Dragana Čovića, izaslanice iz Doma naroda Parlamentarne skupštine BiH Marine Pendeš i ambasadora Republike Hrvatske u BiH Nj.E. Ivana Sabolića. Na hodočašću su učestvovali i komandant Komande za podršku OS BiH generalmajor Marko Stojčić, komandant 4. pješadijske brigade OS BiH brigadir Zdravko Rezo te vojni atašei Republike Hrvatske, Republike Slovenije i Mađarske, kao i ostali vojni i policijski zvaničnici u BiH.

„S jednakim žarom molimo za sve ljude u Bosni i Hercegovini, bez obzira kako se zovu i na koji se način Bogu mole i klanjaju. Molimo za njihovu sreću, međusobnu slogu i svaki napredak, za dijalog kao jedini način rješavanja svih pitanja, za trajan i pravedan mir. Molimo za razboritost i mudrost“, rekao je u prigodnoj propovijedi mons. Vukšić.



31. vojno hodočašće u Mariji Bistrici

Zamjenik ministra odbrane BiH Slaven Galić, zamjenik načelnika ZŠ OS BiH generalmajor Ivica Jerkić i vrhbosanski nadbiskup i apostolski upravitelj Vojnog ordinarijata u BiH mons. Tomo Vukšić, 1. oktobra su predvodili pripadnike MO i OS BiH na 31. vojnom hodočašću u svetištu Majke Božje Bistričke, u Republici Hrvatskoj.

Hodočašće u Mariji Bistrici tradicionalno se održava u organizaciji Vojnog ordinarijata Republike Hrvatske, a ove godine hodočastilo je više od 40 pripadnika MO i OS BiH. Na čelu vojnog stroja OS BiH



na hodočašću bio je pukovnik Fabijan Martić. U euharistijskom slavlju na prostoru Crkve na otvorenom, blaženog Alojzija Stepinca, učestvovali su vojnici, policajci i ratni veterani iz više partnerskih zemalja, a koncelebriranu svetu Misu predvodio je vojni ordinarij u Republici Hrvatskoj msgr. Jure Bogdan.

Hodočašće u Mariju Bistricu za pripadnike MO i OS BiH svake godine organizira Ured katoličkog dušebrižništva MO BiH, na čelu sa vojnim biskupom mons. Tomom Vukšićem. Dan ranije, službena delegacija MO i OS BiH posjetila je Vojni ordinarijat RH gdje se susrela sa vojnim ordinarijem u RH msgr. Jurom Bogdanom.



Korizmena duhovna priprava

U svetištu Kraljice mira u Hrasnu, 16. marta upriličena je korizmena duhovna priprava i ispovijed za katolike Oružanih snaga Bosne i Hercegovine.

Križni put, pripravu za ispovijed i Svetu misu držao je vojni kapelan u kasarni OS BiH „Božan Šimović“ u Čapljini don Tomislav Rajič. Nakon priprave i križnoga puta, uslijedila je ispovijed, a ispovijedali su župnici župa Trebinje, Hrasno, Hutovo, Neum, Gabela i Struge te župe Rotimlja i vojni kapelani.

Sveto misno slavlje predslavio je don Tomislav Rajič, a u propovijedi se osvrnuo o važnosti ispovijedi i korizmenog hoda za Isusom Kristom. Govorio je o važnosti vojske, kako svaki vojnik treba prvo biti vojnik za Krista, a ko se bori za Krista i Božji zakon, vojnik je i branitelj svakog čovjeka.

Na korizmenoj pripravi, križnom putu, svetoj ispovijedi i Svetoj misi, pored komandanta 4. pješadijske brigade brigadir Zdravka Reze, prisustvovalo je oko osamdeset vojnika, podoficira i oficira.

Obilježeni Svi sveti i Dušni dan

U periodu od 25. oktobra do 2. novembra, katolici u MO i OS BiH obilježili su praznike Svih svetih i Dušnog dana u gradovima i kasarnama širom naše zemlje.

Delegacija MO i OS BiH, predvođena zamjenikom ministra odbrane BiH Slavenom Galićem i zamjenikom načelnika ZŠ OS BiH generalmajorom Ivicom Jerkićem, 31. oktobra prisustvovala je centralnoj ceremoniji obilježavanja praznika Svih svetih i Dušnog dana u Mostaru.

Obilježavanje je u Mostaru počelo polaganjem vijenaca i svetom misom zadušnicom u kasarni OS BiH „Stanislav Baja Kraljević“ u kapelici sv. Ivana Krstitelja. Program je nastavljen polaganjem vijenaca i paljenjem svijeća u groblju „Masline“ u Mostaru, ispred Centralnog krsta i ispred Spomenika hrvatskim braniocima na Trgu hrvatskih velikana u Mostaru, te misom u katedrali Marije Majke Crkve, za sve poginule, umrle i nestale branioce Hrvatskog vijeća odbrane i civilne žrtve Domovinskog rata.



U delegaciji MO i OS BiH bili su i komandant Komande za podršku OS BiH generalmajor Marko Stojić, komandant 4. pješadijske brigade OS BiH brigadir Zdravko Rezo i komandant 1. pješadijskog (gardijskog) puka OS BiH brigadir Martin Pažin, a učestvovali su i predstavnici udruženja branilaca, Hrvatskog narodnog sabora te zvaničnici sa svih nivoa zakonodavne i izvršne vlasti u BiH.

NAŠA VOJSKA НАША ВОЈСКА

Bilten Ministarstva obrane - odbrane i Oružanih snaga Bosne i Hercegovine
Билтен Министарства одбране и Оружаних снага Босне и Херцеговине

Pratite nas i na društvenim mrežama:

Web MO BiH



<https://www.mod.gov.ba>

Web OS BiH



<http://os.mod.gov.ba>



<https://www.facebook.com/modbih>



Kanal Ministarstva
odbrane BiH na
<https://www.youtube.com>

www.mod.gov.ba



Instagram

mo_i_os_bih